

## Rau To Paulus Imbooda Ila To Yes Roma Rom—Romans

### *Paulus ipaesia tau ve uraat toni*

<sup>1</sup> You Paulus nambood rau tonene. You mbe-soonja to Yesu Krisi. Ye tau isia ghou nanim le, ve ipoi ghou nanim mbanjoonja toni, lesu navotia varu poia to Maaron. *Mbanj 9:15; Ga 1:15*

<sup>2</sup> Varu poia tonene itaghon saveen mbuaan to muun Maaron ivotia ila yes propeta toni avodi, ve timbooda ila rau patabuan. *Lu 24:25+; Ro 15:8, 16:25+*

<sup>3-4</sup> Varu poia tonene isavia Maaron Natu Yesu Krisi. Ye Tiina toit. Ye izi inim taan ve inim tamtoghon, ve ye sinj to kinik David. Avuvu Patabuan ipaghazonan ghiit pani ighaze mundigiin toni ila mateen, tauto ipatoonja ighaze ye Maaron Natu, ve tapiri tiina kat. *Mt 1:1+; Hib 1:5*

<sup>5</sup> Ila uraat to Yesu Krisi, Maaron ighur ghou nanim mbanjoonja toni itaghon tau poia toni. Lesu naghams ndug ndug to Yuda maau ne tighur ila toni ve titaghon aliija, ve tipatoonja iza tiina ivot ighazoonja. *Mbanj 26:16+; Ro 16:26; Ga 1:15+*

<sup>6</sup> Aazne, tamtoghon to ndug ndug tighur ila to Krisi ve titaghon aliija. Ve yam Roma paam agham tovene. Pasa, Maaron ipoi gham anim Yesu Krisi le wa.

<sup>7</sup> You nambood rau tonene ilat to yam Roma asob to Maaron lolo payam, ve ipoi gham anim tamtoghon toni patabuanja.

Poia toman luuma to Tamaan Maaron yesuru Tiina toit Yesu Krisi iza tiam. Onoon. *1Kor 1:2+; Ga 1:3*

*Paulus ngar toni iyaryaan ighaze ighita yes Roma*

<sup>8</sup> Saveen tiou to ilat tiam muun, nene vene: Ghurla tiam, tamtoghon tisasavia varu irau ndug tisob. Tauto sawa to matag ingal gham, lolog poia pa Maaron tiou, ve napaiti ila Yesu iza. *Ro 16:19; Kol 1:3+*

<sup>9-10</sup> You nambesmbes pa Maaron toman lolog, ve navovotia varu poia to Natu. Ye tau ighita ghou ve iwatag: Saveen to naghaze nasavia, nene onoon. You naghurghur gham ila sunuun tiou irau sawa isob. Ve naghaghason Maaron naghaze ighur leg ataam eta pa nalat naghita gham. Ve ighaze ye lolo tovene, nene pale nalat. *1Tes 3:10; 2Tim 1:3*

<sup>11</sup> Pasa, you naghaze naghita gham, ghoru poia. Leso napalot gham pa ngar ve tapiri to Avuvu Patabuan igham payou, ve ayoon ariana. <sup>12</sup> You naghaze napalot gham, ve yam paam apalot ghou. Leso itina tawapalotin ghiit pa ghurla toit. *Ro 12:6+; 1Kor 12:7+; Hib 10:24*

<sup>13</sup> Yam tonvetaz, you naghaze yam awatag: Sawa naol, you naghamgham ngar naghaze le nalat naghita gham. Pasa, naghaze uraat tiou ighur anona popoia pida tivot ila yam lolomim paam, imale ndug pida to yes to Yuda maau. Eemoghon sawa isob to naghaze namundig, mbeb pida tipon-poon ataam payou. Tauto nalat maau. *Ro 15:22*

<sup>14</sup> You naghita naghaze you leg uraat pa nauul tamtoghon tisob. Yes Grika, ve yes kankanoona

to tivot sone ne paam. Ve yes to ledi ngar tintina, ve yes to ledi ngar maau ne paam. <sup>15</sup> Tauto lolog ipazaagh ghou naghaze navotia varu poia pa yam Roma paam, ghoru poia.

*Varu poia le tapiri tiina*

<sup>16</sup> You mayag pa varu poia maau. Pasa, Maaron tapiri ineep ila. Tapiri tonowen to igham mulin tamtoghon tisob to tighur ila to Krisi. Yes Yuda, ve yes to Yuda maau ne paam. *Mk 8:38; 1Kor 1:18+; 2Tim 1:8*

<sup>17</sup> Varu poia ipaghazonan ghiit pa ataam to Maaron igham mulin ghiit itaghon saveen mbuaan toni, ve igham ghiit taneep denjaad ila mata. Nene ataam to ghurla. Ataam ite paam maau. Tamtoghon to ighaze ighur ila to Krisi, nene pale Maaron ighita ighaze ye ineep denja ila mata. Saveenja ineep ila Maaron aliya to timbooda. Ighaze:

“Tamtoghon to ighaze ighur ila, nene pale ineep denja ila Maaron mata, ve igham nepoon poia ila toni.” *Hab 2:4; Ro 3:21+; Ga 3:11; Pil 3:9*

*Maaron mbalmbali toni injarua tamtoghon tisob pa sosor todi*

<sup>18</sup> Tamtoghon tisob to matadi ingal Maaron maau, ve tighamgham ngar samsamia to denjadi maau, ve titatan saveen onoon, nene Maaron to ineep sambam, ye ipatoon mbalmbali toni padi, ve ighurghur atia izaza todi. *Mbo 7:11; Yo 3:36; Ep 5:6; Kol 3:6*

<sup>19-20</sup> Ngar toni tonene, nene denja. Pasa, ye ipatoon tau padi ve tighazoon pa ngar toni pida

wa. Onoon, tamtoghon tighita Maaron pa matadi maau. Eemoghon sawa to ye ighur sambam ve taan ve inim, yes tighitghita mbeb naol to ye ighur di. Mbeb tonowen tipaghazonan tamtoghon pani tighaze ye Maaron tau, ve tapiri tiina kat. Tapiri tonowen inepneep irau sawa isob. Tovenen tamtoghon irau tipoon taudi pa sosor todi maau. *Mbo 19:1+; Mbanj 14:17+*

<sup>21</sup> Pasa, yes tiwatag: Maaron inepneep. Eemoghon tiroron pani maau. Matadi velegini inimale mbeb sorok. Ve lolodi poia pani ve tipaiti pa ngar popoia to ye ighamgham padi ne maau. Pasa, mbeb soroksorok to anonadi maau, tighamun ngar todi le tiwaghamgham. Ngar todi ighazon ngar maau inimale tineep ila ndoroom lolo. *Mbnp 8:21; Ep 4:17+*

<sup>22</sup> Taudi tighaze yes ledi ngar tiina. Eemoghon maau. Ngar todi iwaghamgham tinimale yes borouja. *1Kor 1:20,27, 3:18+*

<sup>23</sup> Pasa, Maaron to iza tiina pa tapiri ve poia toni, ve inep irau sawa isob, yes timbees pani maau. Tighur muridi pani. Ve tizi tigharaat ledi mbeb tinimale man, ngai, moot, pariiv, ve tamtoghon to tineep ris ve timaat ne anunudi, ve timbesmbees padi. Tighur mbeb soroksorok tonowen tinim maaron padi. *Lo 4:16+; Mbo 106:20; Mbanj 17:29*

<sup>24</sup> Tauto Maaron ipul di titaghon ngar samsamia naol to lolodi igham pani, ve ngar mayanjinja naol to uliid to tingalaan maau, tivotvot ila lolodi. *Mbo 81:12; Ep 4:19; 1Pe 4:3*

<sup>25</sup> Saveej onoon to isavia Maaron tau, nene yes tipuli ineep, ve titaghon ngar kaarom. Ve mbeb to Maaron ighur di tivot, nene yes tighur di tinim

maaron, ve timbesmbees padi. Eemoghon iit irau tapait Maaron pa poia toni irau sawa isob. Pasa, ye to ighur mbbeb tisob tivot. Onoon. *2Tes 2:10; 1Yo 5:20*

<sup>26</sup> Tovenen yes tighur muridi pa Maaron, ve ye ipul di titaghon ngar samsamia naol to lolodi igham pani. Tauto tighamgham ngar mayanjiina naol to denjadi maau. Ndiliva tipul vaiuun ngara kat to Maaron ighuri, ve timogheer pa nditadi ndiliva. *Wkp 18:22+; Ep 5:11+*

<sup>27</sup> Ve yes nditamoot tovene paam. Tipul ngar to vaiuun ndiliva to Maaron ighuri, ve lolodi igham pa nditadi nditamoot pida, ve timomogheer padi, ve tigham ngar mayanjiina naol. Tovenen tiyel pa ataam to Maaron, ve patanani to ivot padi ve iwaghamun di, nene iyat sosor todi tonowen. *Mbnp 19:5; 1Kor 6:9,18*

<sup>28</sup> Yes matadi ingal Maaron maau. Tovenen ye ipul di tila pa naghodi moghon. Tauto ledi ghilaloon muul maau, ve tighamgham ngar samsamia naol to denjadi maau. *Ro 1:22*

<sup>29</sup> Lolodi ivon kat pa ngar samsamia naol to denjadi maau. Matadi mbbeb, tighurghur koi pa tamtoghon, lolodi igham pa mbbeb to nditadi, ve tirabrab tamtoghon timatmaat. Ve tiwazoran di, tighamgham kaarom, lolodi tighaze le tiwaghamun tamtoghon, ve tininin avodi pa nditadi. *Ga 5:19+*

<sup>30</sup> Yes tingalngal saveen pa nditadi, ve tighurghur koi pa Maaron, tiseisei pa taudi, tiveveleg nditadi, tipapait taudi izadi, tipeipei ngar

samsamia papaghu, ve tizorzoor nditamandi ve nditinandi alinadi. <sup>31</sup> Yes ledi ngar maau. Ngar todi iwaghamgham tinimale borouņa. Ve tireureu saveeņ mbuaaņ todi, tighur lolodi pa siņ todi maau, ve lolodi isamin tamtoghon maau. <sup>32</sup> Eemoghon yes tiwatag: Maaron isaav pataghaaņ wa ighaze yes to tighamgham ngar tovene, nene poia pa timaat ve tilaledi. Eemoghon maau. Tinoknoki sone. Ve ighaze nditadi pida titaghon di pa ngar todi samia tonowen, nene igham di lolodi poia ve tipait di. *Mbo 50:18; Ro 6:21,23*

## 2

### *Maaron pale ingabiiz ghiit ve ighur atia pait*

<sup>1</sup> Yo, yom sei to uņgagabiiz tamtoghon ve ughaze yes samsamiadi, you leg saveeņ payom paam. Pasa, ngar to yes tighamghami, yom ughami paam. Tovenen saveeņ to upiyaava padi, nene imuul pa taum. Ve yom irau upon taum pa sosor tiom maau. Pasa, yom ughamgham sosor raraate ini-male yes tighami. *Mt 7:1+; Yo 8:7+*

<sup>2</sup> Iit tawatag: Yes to tighamgham ngar samsamia tovene, Maaron pale ighur atia padi. Ve ighaze ye igham tovene, nene denja. *Ro 1:18*

<sup>3</sup> Ughita. Yom uņgagabiiz tamtoghon ve ughaze yes samsamiadi. Eemoghon taum utaghon ngar raraate inimale yes tighamghami. Vena, ughaze Maaron pale ighurghur ghom? Maau kat! Ye pale ingabiiz ghom ve ighur atia payom paam. <sup>4</sup> Ughita. Maaron ipatoon poia toni tiina kat payom. Pasa, ye itatan ate, ve ighur atia payom rikia maau.

Vena, matam velegin poia toni tonowen? Ughilaal, ma maau? Ye igham tovene, leso igham ghereb payom, ve utoor ngar tiom. *Igham 34:6+; Ep 2:4+; 2Pe 3:9,15*

<sup>5</sup> Eemoghon ngar tiom iyaryaan kat, ve lolom pa utoor ngar tiom maau. Ngar to ughamghami, nene inimale undoundou lem atia pa samia tiom. Mboŋ Muri, Maaron pale ipatoon mbalmbali toni ivot ighazoon, ve ighur atia denja iyat tamtoghon enaena sosor todi. Sawa tonenen, mbalmbali toni pale inarua ghom pa sosor tiom. *Ro 1:18; Syg 6:17*

*Maaron pale ighur atia pa tamtoghon enaena itaghon ngar todi todi*

<sup>6</sup> Maaron pale ighur atia pa tamtoghon enaena itaghon ngar todi todi. *Mbo 62:12; 2Kor 5:10; Syg 22:12*

<sup>7</sup> Tovenen yes to tiyoon ariana pa badoon patanani, ve tighamgham ngar popoia, ve tizuaria di tighaze le Maaron tau ipait di ve tineep tomani ila nguruba lolo irau sawa isob, nene yes pale tigham nepoon poia ila toni itaghoni taghoni gha ila. *Mt 25:46*

<sup>8</sup> Eemoghon yes to titaghon saveen onoon maau, ve matadi ingal taudi moghon, ve tighamgham ngar to denja maau, nene pale Maaron ate yabyab padi kat, ve mbalmbali toni tiina iza todi. *Mt 7:18; Ro 1:18; 2Tes 1:8*

<sup>9</sup> Tovenen tamtoghon tisob to tighamgham ngar samsamia, nene pale patanani tiina toman yabyabuun igham di. Pale igham yes Yuda muun, ghoros yes to Yuda maau ne anadi. <sup>10</sup> Eemoghon tamtoghon tisob to tighamgham ngar popoia, nene pale Maaron ipait di, ve yesna tilup di tinim

ee moghon, ve tineep pooi ila ye taau nguruba lolo. Ye pale igham tovene pa yes Yuda muuṅ, ghorogham pa yes to Yuda maau ne paam. *Mbaṅ 10:34*  
<sup>11</sup> Pasa, Maaron ivool to tamtoghon eta maau. Gabizooṅ toni, ye itaghon ngar raraate moghon pa tamtoghon tisob. *Ep 6:9; 1Pe 1:17*

<sup>12</sup> Onoon, yes to Yuda maau, tikankaan pa tutuuṅ to Mose. Eemoghon ighaze tisor ila Maaron mata, ye pale ighur atia padi ve tilaledi. Ve yes Yuda tineep ila tutuuṅ to Mose samba, ve tutuuṅ tonowen igham pooz padi. Tovenen Maaron pale ingabiiz di itaghon tutuuṅ tonenen.  
<sup>13</sup> Ve tapatum ghiit. Pasa, loṅaaṅ tutuuṅ moghon irau igham ghiit taneep denjaad ila Maaron mata ne maau. Tataghon tutuuṅ, ghorogham taneep denjaad ila ye mata. *Mt 7:21; Yems 1:22+, 2:22+*

<sup>14</sup> Onoon, ndug ndug to Yuda maau, tiwatag tutuuṅ to Mose maau. Eemoghon muuṅ ve inim, yes paam ledi ghilalooṅ ineep ila lolodi. Ghilalooṅ todi tonowen to ighamgham pooz padi inimale tutuuṅ. *Mbaṅ 10:35*

<sup>15</sup> Ghilalooṅ todi tonowen ipatooṅ di ighaze Maaron imbood tutuuṅ toni ila lolodi wa. Tauto sawa to tigham ngar samia eta, taudi tiyamaana ila lolodi tighaze tigham sosor. Ve sawa to tigham ngar poia, tiyamaan di tighaze ledi sosor maau. *Yer 31:31+; Hib 8:10*

<sup>16</sup> Varu poia to you navovotia, isaav tovene: Sawa to Mboṅ Muri, Yesu Krisi pale igham uraat to gabizooṅ to Tama Maaron ighuri ila nima. Sawa tonenen, ngar ngozaaṅ to tamtoghon pale tisob tivot tighazooṅ, ve ye ighur atia padi. *Mbaṅ 10:42, 17:31; 2Kor 5:10*



### *Yes Yuda timamalaan pa tutuun to Maaron*

<sup>17</sup> Yom sei to uwaat taum ughaze yom Yuda, you leg saveen payom paam. Pasa, yom unumeer tutuun to Mose ughaze igham ghom uneep denjam ila Maaron mata, ve upapait taum ughaze yom uwatag katin Maaron. *Mt 3:9; Yo 5:45; Ro 9:4+*

<sup>18</sup> Ngar to Maaron lolo pani, yom uwatagi. Ve mbeb to poia kat ilib pa mbeb tisob, nene tutuun ipaghazonan ghom pani ve ughilaala wa. <sup>19-20</sup> Yom ugham ngar ughaze ngar popoia ve saveen onoon to ineep ila tutuun to Mose, yom ughazonan pani wa. Tauto unumeer taum ughaze yom irau upatoon ataam pa yes to matadi pisi, ve unum ghazonan pa yes to tineep ila ndoroom lolo. Ve ughaze upasalungan yes kankanonja, ve upatoot yes to ngar todi imatu sone. *Mt 15:14; Yo 9:40+*

<sup>21</sup> Laak, yom to ughaze upatoot tamtoghon pida, pughu vena to upatoot taum maau? Ughita. Yom uvovotia saveen pa tamtoghon ughaze tiyub malep. Ve vena pa yom taum? Uyubyub, ma maau? *Mbo 50:16+; Mt 23:3+*

<sup>22</sup> Ve usavsaav pa tamtoghon ughaze tighur maat malep. Taum ughur maat, ma maau? Ve ughaze lolom pa maaron kaaromja rita maau kat. Vena, uyub mbeb eta to rumai todi, ma maau? *Mt 5:27+*

<sup>23</sup> Yom to upapait taum ughaze uwatag katin tutuun to Maaron, vena? Taum umalaan pa tutuun tonowen rita maau? Pasa, ighaze umalaan pani, yom uwaghamun Maaron iza. <sup>24</sup> Ngar to ughami, timbood saveenja pataghaan wa. Tighaze:

“Ngar to yam aghami, nene inim pughu pa ndug ndug to Yuda maau ne tipiyaav

saveņ velegiņ pa Maaron.” *Ezek 36:20+; 2Pe 2:2*

*Ngar to zirooņ tamtoghon, nene mbeb tau maau. Mbeb tau nene tataghon Maaron ngar toni*

<sup>25</sup> Ighaze utaghon katin tutuun to Maaron, nene pale ngar to zirooņ ghom iuul ghom. Ve ighaze umamalaan pa tutuun toni, nene pale ngar to zirooņ ghom inim mbeb sorok, ve Maaron ighita ghom ighaze yom raratem unumale yes to tizir di maau. *Ga 5:3*

<sup>26</sup> Ve ighaze ngeu eta tiziri maau, eemoghon mata kisin tutuun to Maaron ve itaghoni, nene pale Maaron ighita ighaze ye ineeļ denja ila mata raraate inimale yes to tizir di. *Ro 2:7,10; Ga 5:6*

<sup>27</sup> Onoon, tutuun to timbooda, yam Yuda awatagi. Ve tizir gham wa. Eemoghon ighaze amamalaan pa tutuun, ghoru apatum gham. Pasa, yes to tizir di maau, eemoghon matadi kisin tutuun to Maaron ve titaghoni, yes pale tipatooņ sosor tiam ivot ighazooņ, ve Maaron ighur atia tiina payam. *Mt 12:41+*

<sup>28-29</sup> Ighaze tamtoghon eta iparim tau ighaze ye Yuda, eemoghon itaghon Maaron ngar toni maau, nene ye Yuda tau maau. Pasa, ngar tau to yes Yuda, nene mbeb to lolood. Ve uraat to zirooņ tamtoghon tovene paam. Nene mbeb to uliid moghon maau. Nene mbeb to lolood. Maaron Avuvu igham ngar munġina ilale, ve igham ngar paghu ivot ila lolood. Mbeb tovene, tutuun to timbooda, irau igham pait maau. Tamtoghon to ighaze mbeb tovene ivot pani, ye pale igham ngar pa pakuruun to tamtoghon maau. Ye pale izuarua

tau pa pakuruuŋ to inim pa Maaron moghon. *Ro 9:6+; 1Kor 4:5; 2Kor 3:6; Ga 6:15; Pil 3:3; Kol 2:11+*

### 3

*Yuda pida tighur muridi pa Maaron. Eemoghon ye itaghon saveeŋ mbuaaŋ toni*

<sup>1</sup> Saveeŋ tiou tonene avaat ipamundigin ghasoniin tovene: Vena, yes Yuda ledi mbef eta to igham di tilib pa tamtoghon pida, ma maau? Ve ŋgar to zirooŋ tamtoghon paam, iuul di vena?

<sup>2</sup> Aghita. Maaron iuul yes Yuda ila ataam naol. Mbef tiina kat to ye igham padi, nene ye ighur saveeŋ toni ila nimadi pa tingini. *Mbo 147:19+; Mbaŋ 7:38; Ro 9:4*

<sup>3</sup> Onoon, saveeŋ to timbua toman Maaron, tamtoghon todi pida titaghoŋi maau. Ve vena? Ŋgar todi tonowen irau igham Maaron paam ireu saveeŋ mbuaaŋ toni? *Ro 11:29; 1Kor 1:9; 2Tim 2:13*

<sup>4</sup> Maau kat! Ighaze tamtoghon tisob tigham kaarom, tigham kaarom lak! Eemoghon Maaron saveeŋ toni, nene onoon moghon, ve ye itataghon saveeŋ mbuaaŋ toni irau sawa isob. Saveeŋa timbooda pataghaaŋ wa. Tighaze:

“Maaron, saveeŋ isob to usasavia, nene tamtoghon tighilaala tighaze denja moghon.

Ve ighaze koiamaŋa tipayoon ghom pa savaaveeŋ, nene pale ulib padi.” *Mbo 51:4, 116:11*

<sup>5</sup> You nawatag. Ndiran pida to titaghoŋ ŋgar to taan, pale tighamun saveeŋ tighaze: “Ighaze sosor toit ipaghazoŋan ŋgar denja to Maaron, pughu vena to ye ate yabyab pait ve ighur atia pa sosor

toit? Ngar toni tonowen, denja maau. Pasa, ighaze iit tagham sosor maau, nene pale ye le ataam eta pa ipatoon ngar toni denja ivot ighazon ne maau. *Ro 3:8,*

<sup>6</sup> Ngar tovene poia maau kat! Ighaze Maaron itaghon ngar denja maau, nene pale ingabiiz iit tamtoghon to taan vena?

<sup>7</sup> Ve tamtoghon ite pale isaav sorok ighaze: “Ngar kaarom to you naghami, nene iuul Maaron. Pasa, ipaghazonan ngar toni to ye avo onoon ivot ighazon. Ve mbeb tonene pale igham tamtoghon tipait iza. Ve ighaze venen, pughu vena to ye ingabiiz ghou ighaze you naghamsosor, ve ighur atia payou?” <sup>8</sup> Ngar tovene, nene inimale saveen to yes to ngar todi iwaghamgham tighaze iit tagham ngar samia, ghoropoia. Pasa, ngar toit samsamia pale inim ataam pa mbeb poia ivot. You nawatag: Ndiran pida tingal saveen payou sorok tighaze you navovotia saveen tovene pa tamtoghon. Ndiran tonowen, Maaron tau pale ighur atia padi. Ve ighaze ye igham tovene, nene pale denja.

*Tamtoghon tisob tipul ataam to Maaron*

<sup>9</sup> Tovenen pale tasaav vena? Yei Yuda nilib pa yes to Yuda maau? Maau kat! Pasa, you navotia sosor toit ivot ighazon wa. Iit tasob taneep ila samia lolo. Yes Yuda, ve yes to Yuda maau ne paam.

*Ro 1:18+; Ga 3:22*

<sup>10</sup> Saveenja timbooda pataghaan wa. Tighaze:

“Tamtoghon eta ineep denja ila Maaron mata maau.

<sup>11</sup> Ve tamtoghon eta le ghilaloon maau.

Eta izuariala tau pa Maaron maau. *Mbo 14:1+, 53:1+*

<sup>12</sup> Pasa, tamtoghon tisob tipul ataam toni wa. Tauto tiwaghamgham, ve irau tigham uraat poia eta maau.

Todi eta igham njar poia maau. Tisob tisami moghon.

<sup>13</sup> Saveen mbuuz a to ivotvot ila avodi, nene inimale naal to avo ikakaak.

Avodi kaarom, ve saveen todi iwaghamun tamtoghon inimale moot samia. Pasa, saveen samsamia naol ivotvot ila avodi.

*Mbo 5:9, 140:3*

<sup>14</sup> Tovenen avodi poia maau. Moghon moghon tipipiyaav saveen samsamia pa tiwaghamun tamtoghon. *Mbo 10:7*

<sup>15</sup> Sawa isob, tilandaad pa rabuun tamtoghon timatmaat.

<sup>16</sup> Ataam to titaghoni, nene ataam to tawaghamun tamtoghon ve tagham patajani padi.

<sup>17</sup> Tovenen ataam to talup ghiit tanim ee moghon ve taneep toman lolood luuma, nene yes tiwatagi rita maau. *Is 59:7+; Lu 1:79*

<sup>18</sup> Ve Maaron paam, timatughez pani maau, ve matadi ingali rita maau." *Mbo 36:1*

*Ataam to taghoniin tutuun irau igham ghiit taneep denjaad ila Maaron mata maau*

<sup>19</sup> Iit tawatag: Saveen isob to ineep ila tutuun to Mose, nene inarua yes Yuda to tineep ila tutuun samba. Eemoghon yes titaghon katin tutuun tonowen maau. Tovenen iit tamtoghon tasob to taneep izi taan, tutuun to Maaron ineep pa ipoon avood ve ipamundigin njar toit. Leso taghilaal

sosor toit, ve tawatag taghaze Maaron pale ighur atia pait. *Ro 3:9,23, 4:15*

<sup>20</sup> Tovenen ngar to taghoniin tutuun, nene irau inim ataam pa tamtoghon eta pa ineep denja ila Maaron mata ne maau. Maau le maau kat. Tutuun ineep pa ipamundigin ngar toit, leso taghilaal sosor toit. *Mbo 143:2; Ro 7:7; Ga 2:16, 3:11*

*Ataam to Maaron igham ghiit taneep denjaad ila mata*

<sup>21</sup> Ve aazne, Maaron ivotia ataam paghu to igham mulin ghiit itaghon saveen mbuaan toni, ve igham ghiit taneep denjaad ila mata. Ataam tonene, nene ataam to taghoniin tutuun maau. Eemoghon tutuun ve saveen to muun yes propeta tisavia, nene isavsaav pa ataam tonene. *Mbnp 15:6; Mbanj 10:43, 15:11; Ro 4:6; Pil 3:9*

<sup>22-23</sup> Ataam tonene, nene ataam to ghurla. Tamtoghon tisob to tighur ila to Yesu Krisi, Maaron pale ighita di ighaze tineep denjadi ila mata. Yes Yuda, ve yes to Yuda maau ne paam. Pasa, tamtoghon eta ilib pa ita ite maau. Iit tasob raraan moghon. Tasob tasosor wa. Pasa, tataghon Maaron gabua ve ngar toni iraua maau. Ngar ve nepoon toit, nene ipatoonja ighaze ye iza tiina ne maau. *Ro 1:17, 11:32; Ga 3:22*

<sup>24</sup> Eemoghon poia to Maaron ilib kat. Tauto lolo isamin ghiit, ve ighur leed ataam ite pa taneep denjaad ila mata. Ataam tonene ivot ila tauud poia toit eta maau. Nene ivot ila uraat to Yesu Krisi. Ye imbaad sosor toit atia, ve ipas ghiit tavot pa samia tapiri. *Ro 5:1; Ep 1:7, 2:8; Tit 3:5*

<sup>25</sup> Maaron ighur Krisi ighaze imaat inim watoonrau, leso sinj toni ireu sosor to tamtoghon,

ve itatan mbalmbali to Maaron. Tovenen yes to tighur ila toni, ye pale ireu sosor todi isob ilale.

Yes to muun tigham sosor ne paam, Maaron lolo isamin di, tauto iwaghamun di maau ve ipul di tineep. Ngar toni tonowen, nene denja. Pasa, ye iwatag ighaze muri, Natu pale imbaad sosor todi atia.

*Mbanj 13:38+; 2Kor 5:19; Kol 1:20*

<sup>26</sup> Ve aazne tovene paam. Ighaze Maaron lolo isamin yes to tighur ila to Kriisi, ve ireu sosor todi, ve igham di tineep denjadi ila mata, nene denja. Pasa, Kriisi imbaad sosor todi atia wa.

<sup>27</sup> Ve ighaze venen, sei irau ipait tau ighaze ngar to ye ighamghami, nene poia ila Maaron mata? Maau. Paitoonj tovene irau ivot muul maau. Pasa, iit tataghon katin tutuun, ghoru tapait tauud. Eemoghon aazne, iit tataghon ataam to tutuun muul maau. Tataghon ataam to ghurla.

*1Kor 1:29+; Ro 4:5; Ep 2:9*

<sup>28</sup> Pasa, iit tawatag: Ngar to taghoniin tutuun, nene irau igham ghiit taneep denjaad ila Maaron mata maau. Ghurla toit, tauto inim ataam pait ve taneep denjaad ila Maaron mata.

*Ro 8:3; Ga 2:16; Ep 2:8+*

<sup>29</sup> Vena, Maaron ye Maaron to yes Yuda moghon? Maau. Ye Maaron to yes to Yuda maau ne paam.

*Mbanj 10:34+; Ro 10:12; Ga 3:28*

<sup>30</sup> Pasa, Maaron ee moghon to inepneep. Ve ye ighur ataam ee moghon pa tamtoghon tisob tineep denjadi ila mata. Yes to tizir di, ve yes to tizir di maau ne paam. Ataam ee moghon to tineep denjadi ila Maaron mata, nene ghurla todi.

*Mbanj 15:9+; Ro 4:11+; Ga 3:8*

31 Vena? Ighaze tapakur ghurla toit inim mbeb tiina, pale igham ghiit mataad velegin tutuun to Maaron inimale mbeb sorok? Maau kat! Ghurla toit, nene ipamundigin ghiit pa tataghon katin tutuun ngara. *Mt 5:17; Ro 8:3-4, 13:10; Ga 5:22+*

## 4

*Abaram yesuru David tipatoonj ghiit pa ataam to ghurla*

<sup>1</sup> Yo, iit mataad ingal ila pa Abaram to yei Yuda nivot ila toni. Pale tasaav vena pani? <sup>2</sup> Ye igham ngar popoia moghon ve itaghon katin tutuun to Maaron, tauto Maaron ighita ighaze ye ngeu denja? Maau. Pasa, ighaze venen, nene ye irau ipait tau ila Maaron mata. <sup>3</sup> Eemoghon Maaron aliņa to timbooda, isaav ighaze:

“Abaram ighur ila to Maaron, tauto Maaron ighita ighaze ye ngeu denja.” *Mbnp 15:6; Ga 3:6; Yems 2:23*

<sup>4</sup> Ighaze tamtoghon eta igham uraat, ve tigham le atia, nene taghita taghaze atia tonenen tigham pani sorok maau. Nene tigholi pa uraat toni. *Ro 11:6*

<sup>5</sup> Ve tamtoghon to ighaze inumeer ngar ve uraat popoia to ye igham di ne maau, ve ighur ila ighaze Maaron moghon irau igham iit tamtoghon samsamiaad taneep denjaad ila mata, nene tamtoghon tovene to Maaron pale ighita ghurla toni, ve iwaata ighaze ye ngeu denja. *Yo 6:29; 2Kor 5:21; Pil 3:9*

<sup>6</sup> Kinik David paam isavia saveenj raraate ighaze: Yes to ngar ve uraat todi poia ila Maaron mata maau, eemoghon ye ighita di ighaze tineep denjadi



ila mata, nene yes pale tinidi iza pa poia toni to iza todi. Pasa, saveeŋ toni waaro eez isaav tovene:

<sup>7</sup> “Ighaze tamtoghon eta izoor Maaron aliŋa ve isosor pa ataam toni, ve Maaron lolo isamini ve ireu sosor toni, nene pale tini iza pa poia to Maaron to iza toni.

<sup>8</sup> Onoon kat, ighaze Maaron ipul sosor to tamtoghon eta, ve mata iŋgali muul maau, nene pale tamtoghon tonenen tini iza pa poia to Maaron to iza toni.” *Mbo 32:1+; 2Kor 5:19*

<sup>9</sup> Ve sei masin to poia to Maaron iza todi? Yes Yuda moghon to tizir di, ma ndug ndug to tizir di maau ne paam? Mataad iŋgal imuul ila pa Abaram. Yei nisavia wa: Ghurla toni, tauto Maaron ighita ighaze ye ŋgeu denja eez. <sup>10</sup> Laak, sawa sine to Maaron ighita Abaram ighaze ye ŋgeu denja? Tiziri le isob, ghoru Maaron isaav pani tovene? Maau. Maaron ighita Abaram ighaze ye ŋgeu denja muuŋ, ve muri ghoru, tiziri. <sup>11</sup> Tovenen sawa to tiziri sone, ghurla toni ighami ineep denja ila Maaron mata. Ve muri ghoru, tiziri. Maaron isavia ŋgar to zirooŋ tamtoghon pa Abaram inim ghilaloŋ pa ghurla toni, leso ipaloti ve iwatag kat ighaze ye ineep denja ila Maaron mata. Tauto yes to tizir di maau ve tighur ila, ve Maaron ighita di ighaze tineep denjadi ila mata, nene tisob tinim Abaram papaghu toni. *Mbnp 17:10+; Ro 4:16+; Ga 3:7+*

<sup>12</sup> Ve yes to tizir di ne paam. Ighaze titaghon ŋgar to tamaan Abaram, ve tighur ila to Maaron inimale Abaram ighur ila toni indeeŋ sawa to tiziri sone,

nene pale tinim Abaram papaghu toni.

*Yes to tighur ila, tauto tighita saveeņ mbuaaņ to Maaron anoņa*

<sup>13</sup> Muuņ, Maaron imbua saveeņ toman Abaram ve papaghu toni ighaze ye pale igham taan isob inim ledi. Laak, Abaram itaghton katin tutuuņ to Maaron, tauto ye isavia saveeņ tonene pani? Maau. Maaron isavia saveeņ tonene pani pasa, Abaram ighur ila toni, ve ghurla toni ighami ineep denja ila ye mata. *Mbnp 17:4+*

<sup>14</sup> Ighaze tamtoghon to titaghton katin tutuuņ, yes moghon to pale tighita saveeņ mbuaaņ to Maaron anoņa, nene pale anoņa ivot vena? Maau. Pale inim mbeb sorok. Ve ghurla toit tovene paam. Inim mbeb sorok. <sup>15</sup> Pasa, tamtoghon eta itaghton katin tutuuņ maau. Iit tasob tamamalaan pani. Tauto tutuuņ inim pughu pa mbalmbali to Maaron izaza toit. Ve inimale tutuuņ ineep maau, tone irau tamalaan pani maau, ve leed sosor ila Maaron mata maau. *Ro 5:13, 7:7+; Ga 3:10,18*

<sup>16</sup> Tauto Maaron igham poian ghiit, ve ighur leed ataam ite leso taghita saveeņ mbuaaņ toni anoņa. Nene ghurla toit. Pasa, ņgar toni iyaryaan ighaze le saveeņ mbuaaņ toni ighur anoņa pa Abaram papaghu toni tisob. Yes Yuda to titaghton tutuuņ to Mose, ve yes to Yuda maau, to titaghton Abaram pa ghurla toni ne paam. Pasa, iit tasob to taghur ila to Krisi, Abaram inim taman. *Ro 3:24, 15:8; Ga 3:7,22*

<sup>17</sup> Saveeņa timbooda pataghaan wa. Tighaze:  
 “You naghur ghom leso unum ival tiina to ndug ndug tamandi.” *Mbnp 17:4+*

Aazne, saveeᅇ tonene anoᅇa ivot pa iit tamtoghon to taghur ila to Krisi. Pasa, Maaron ighita ghiit ighaze iit tanim Abaram papaghu toni. Abaram ipatoonᅇ ghiit pa ataam to ghurla. Pasa, ye ighur ila to Maaron ighaze ye irau ipamundigin yes ma-teenᅇa. Ve ighur ila ighaze Maaron isaav moghon, ve mbef to muuᅇ tineep maau ne, tivot. *Yo 5:21; Hib 11:3,19*

### *Abaram ipatoonᅇ ghiit pa ataam to ghurla*

<sup>18</sup> Muuᅇ, Maaron imbua saveeᅇ toman Abaram ighaze: “Papaghu tiom pale timasa tinim ndiᅇndiᅇ ndiᅇndiᅇ.” Abaram iwataᅇ: Tau tapiri irau igham saveeᅇ tonowen anoᅇa ivot maau. Eemoghon ye ighur ila kat ighaze Maaron tapiri pale igham mbef tonowen ivot. Tauto ighurghur mata pani. Ghurla toni iyaryaᅇ tovene, tauto inim ival tiina to ndug ndug tamandi. *Mbnp 15:5*

<sup>19</sup> Sawa tonenen, Abaram iwataᅇ: Ye inim olman wat, ve tapiri imbool wa. Pasa, ndaman toni igharau pa tamoot liim (100). Ve Sara paam inim olman tidi. Sawa toni to popaᅇ isob wa. Eemoghon Abaram iyoon ariᅇa pa ghurla toni. *Mbnp 17:17, 18:11; Hib 11:11+*

<sup>20</sup> Ve lolo ru pa saveeᅇ mbuaᅇ to Maaron maau. Ghurla toni iyaryaᅇ le iyaryaᅇ kat. Tauto ipatoonᅇ Maaron iza tiina ivot ighazoonᅇ. <sup>21</sup> Pasa, Abaram ighur ila kat tovene: Ighaze Maaron imbua saveeᅇ pa mbef eta, nene ye tapiri irau igham anoᅇa ivot. *Mt 19:26*

<sup>22</sup> Abaram ghurla toni iyaryaᅇ tovene, tauto Maaron ighita ighaze ye ᅇgeu deᅇia.

<sup>23-24</sup> Saveeŋ waaro tonene, timbooda pa Abaram moghon maau. Injarua ghiit paam. Pasa, ighaze iit taghur ila to Maaron to ipamundigin Tiina toit Yesu pa mateeŋ, nene ye pale ighita ghiit ighaze iit paam taneep denjaad ila mata. *Ro 10:9, 15:4*

<sup>25</sup> Pasa, sosor toit, tauto Maaron ipul Yesu ila tamtoghon nimadi, ve tirabi imaat. Ve ipamundigini pa mateeŋ, leso igham ghiit taneep denjaad ila mata. *Ro 5:8-9; 2Kor 5:21*

## 5

*Aazne, itiŋa Maaron talup ghiit tanim ee moghon wa*

<sup>1</sup> Tovenen, iit to taghur ila to Krisi, taneep denjaad ila Maaron mata wa. Ve Tiina toit Yesu Krisi irab motin koi to muuŋ ineep ila itiŋa Maaron sosood. Ye inim ataam pait, tauto aazne itiŋa Maaron talup ghiit tanim ee moghon wa. *Mbaŋ 10:36; Ro 3:28; 2Kor 5:19; Ep 2:13+; Kol 1:20*

<sup>2</sup> Krisi ndamo pait, tauto iit to taghur ila toni, irau tala tagharau Maaron, ve taneep ila poia toni lolo. Ve lolood poia ve tiniid iza pasa, iit taghurghur mataad pa sawa to ye igham ghiit tala taneep tomani ila nguruba lolo izi ndug sambam. *Ep 2:17, 3:12; Hib 10:19*

<sup>3</sup> Ve tonene moghon maau. Lolood poia ve tiniid iza pa patañani naol to tivotvot pait ne paam. Pasa, iit tawatag: Patañani toit ipariaaŋ ghiit, leso tayoona ariana. *Mbaŋ 5:41; 2Kor 12:10; Yems 1:2+; 1Pe 1:5+*

<sup>4</sup> Ve ighaze tayoona ariana pa badooŋ patañani, nene pale Maaron ighita ghiit ighaze iit taraua. Ve

ighaze venen, nene irau taghur mataad pa nepoon poia to ye pale igham pait. *Hib 6:18+, 10:36; Yems 1:12*

<sup>5</sup> Ve iit irau taghur mataad pani sorok ne maau. Ye pale igham nepoon poia tonowen pait. Pasa, ye igham Avuvu Patabuan pait wa. Ve Avuvu tonowen izeev ghiit pa poia to Maaron, tauto taya-maana ila lolood taghaze Maaron lolo ineep toit kat. *Ro 8:15; Ga 4:6*

<sup>6</sup> Aghita. Muun, iit mataad ingal Maaron maau, ve leed tapiriid irau to tauul tauud maau. Eemoghon indeen sawa kat to Maaron tau ighuri, Yesu Krisi imaat pa iit tamtoghon samsamiaad. *Ro 4:25; Ga 4:4+; Kol 2:13*

<sup>7</sup> Tamtoghon enaenja avaat irau tiyokia taudi ve timaat pa tamtoghon ite. Ve irau tigham tovene pa tamtoghon soroksorok maau. Ngeu to ngar toni denja ve poia kat, ghoroyes irau tiyokia taudi ve timaat pani. <sup>8</sup> Eemoghon Maaron ngar toni ite. Sawa to ngar to ghamuun sosor ikiskis ghiit sone, Krisi imaat pait. Ngar toni tonowen ipatoon ghiit ighaze Maaron lolo ineep toit kat. *Yo 3:16, 15:13; 1Pe 3:18; 1Yo 4:10*

<sup>9</sup> Ve ighaze venen, iit tawatag kat taghaze: Krisi pale igham mulin ghiit pa mbalmbali to Maaron to pale ivot pa Mbonj Muri ne paam. Pasa aazne, sinj toni igham ghiit taneep denjaad ila Maaron mata wa. *1Tes 1:10*

<sup>10</sup> Aghita. Muun, itinja Maaron tawaghurun koi pa tauud. Eemoghon mateenj to Natu irab motin koi tonowen, tauto aazne itinja Maaron talup ghiit tanim ee moghon wa. Ve ighaze venen, iit tawatag kat tovene: Natu to imundig pa mateenj ve aazne

ineep mata iyaryaar, ye pale igham mulin ghiit ve taneep pooi. *2Kor 5:18+; Ep 2:16; Kol 1:20+*

<sup>11</sup> Ve tonene moghon maau. Iit tiniid iza pa Maaron, ve tapaiti ila Tiina toit Yesu Krisi iza. Pasa, Krisi inim ataam pait, tauto aazne, itiŋa Maaron talup ghiit tanim ee moghon wa.

*Adam inim pughu pa mateeŋ, ve Krisi inim pughu pa nepoon poia to taghami ila to Maaron*

<sup>12</sup> Iit tawatag: Muuŋ, ŋgeu ee moghon igham sosor, tauto ŋgar samia ivot le irau taan isob. Sosor toni, tauto igham tamtoghon tisob tisami. Ve ye to inim pughu pa mateeŋ ivot le irau tamtoghon tisob. *Mbnp 3:6+; Ro 6:23; 1Kor 15:21+*

<sup>13-14</sup> Sawa to Adam, ve inim imuul sawa to Maaron isavia tutuuŋ toni pa yes Israela, tamtoghon to tineep izi taan tighamgham sosor. Onoon, tigham sosor tinimale Adam maau. Pasa, sawa tonenen, yes ledi ŋgalsekiin eta inimale Adam maau. Tovenen tutuuŋ to Maaron to timalaan pani, yes tighazoon pani maau. Ve tamtoghon to ighaze ikankaan pa tutuuŋ, nene Maaron irau mata kisin sosor toni maau. Eemoghon sawa tonenen, tamtoghon tisob tineep ila mateeŋ samba, ve timatmaat. Pasa, yes tineep iloon ila Adam sosor toni lolo.

Adam ipatoon ghiitpa Ŋgeu to inim muri. *1Kor 15:21+,45*

<sup>15-16</sup> Pasa Adam, ye ŋgeu ee moghon. Ve sawa to izoor Maaron aliŋa ve igham sosor, nene inim pughu pa mateeŋ igham tamtoghon tisob. Yesu Krisi tovene paam. Ye ŋgeu ee moghon. Ve ila uraat toni, poia tiina to Maaron iza to ival tiina sorok, ve ireu sosor todi. Tovenen poia to Maaron

ipatoonja pait, ve patanjani to ivot ila sosor to Adam, nene raratedi maau. Pasa, sosor ee moghon kat to Adam, to iwaghamun ghiit tasob, ve inim pughu pa Maaron ighur atia pait. Eemoghon tamtoghon tigham sosor katindi inim inim le sawa to Yesu, ghoru Maaron igham poian ghiit sorok itaghon tau poia toni, ve igham ghiit taneep denjaad ila mata. <sup>17</sup> Tovenen muun, Adam izoor Maaron aliņa, tauto inim pughu pa tamtoghon tisob tineep ila mateen samba ve timatmaat. Eemoghon poia to Maaron, nene tiina le tiina kat. Ve ngeu ee moghon to inim ataam pait ve poia to Maaron iza toit, nene Yesu Krisi. Tovenen yes to tigham poia to Maaron ila toni, ve ye igham di tineep denjadi ila Maaron mata, nene pale tigham nepoon poia ila toni, ve tineep tinimale kinik ve tigham pooz le alok.

*Yo 1:16, 10:10; Syg 22:5*

<sup>18-19</sup> Tovenen onoon, Adam, ye ngeu ee moghon. Ve sawa to izoor Maaron aliņa ve imalaan pa tutuun toni, sosor toni tonowen, tauto inim pughu pa Maaron ighur atia pa tamtoghon tisob. Krisi tovene paam. Ye ngeu ee moghon. Ve itaghon katin ngar denja, tauto igham ival tiina tineep denjadi ila Maaron mata, ve tigham nepoon poia ila toni.

*Ro 6:23; Pil 2:8; Hib 5:8+; 1Yo 2:2*

<sup>20</sup> Maaron igham tutuun pait, leso samia toit ivot ighazon, ve taghilaal tauud taghaze iit ndiran to ghamuun sosor. Onoon kat, iit tamtoghon, sosor toit tiina. Eemoghon poia to Maaron, nene tiina le tiina kat. Ilib pa sosor toit.

*Ro 3:20, 7:7+*

<sup>21</sup> Tovenen muun, iit taneep ila ngar samia samba ve samia igham pooz pait. Tauto igham mateen ivot pait. Eemoghon aazne, Tiina toit Yesu Krisi

igham ghiit taneep denjaad ila Maaron mata wa. Tauto taneep ila poia to Maaron samba, ve poia toni ighamgham pooz pait. Leso tagham nepoon poia ila toni itaghoni taghoni gha ila. *Yo 1:17; Ro 6:23*

## 6

*Iit tala toman Krisi pa mateej toni, tovenen tapul ngar samia ineep*

<sup>1</sup> Yo, ighaze Maaron lolo isamin ghiit ve ireu sosor toit itaghon tau poia toni, pale tasaav vena? Pale tanoknok ghamuuj ngar samia, lesu poia toni tiina iza toit? *Ro 3:5+*

<sup>2</sup> Maau kat! Iit to taghur ila to Krisi, tapul ngar samia wa, tanimale yes mateeja. Pale tataghon ataam samia muul vena? *Kol 3:3+; 1Pe 2:24*

<sup>3</sup> Yam awatag maau? Sawa to tagham ya, itiija Yesu Krisi talup ghiit tanim ee moghon, ve tala tomani pa mateej toni. *Ga 2:20, 5:24*

<sup>4</sup> Onoon kat, sawa to tagham ya, nene inimale tamaat, ve titavia ghiit toman Krisi. Leso laghoon toman nepoon toit inim paghu, raraate inimale Krisi imaat, ve Tama Maaron tapiri ipamundigini pa mateej. *2Kor 5:17; Ep 2:5+, 4:22+; Kol 2:12*

<sup>5</sup> Ighaze tala toman Krisi pa mateej toni ve nepoon toit munjina isob, nene pale tala tomani pa mundigiinj toni paam, ve tagham nepoon paghu inimale ye igham nepoon paghu. *Ro 8:11; Pil 3:10+; 2Tim 2:11*

<sup>6</sup> Iit tawatag: Lolood munjina, nene tirabi toman Yesu izala ai pambaroon wa. Lesu ngar samia



to ipapazaagh ghiit ne tapiri isob, ve tanim mbe-soonja pani muul sob. *Ga 2:19-20, 5:24; Kol*

*3:5*

<sup>7</sup> Tamtoghon to ighaze imaat wa, nene samia tapiri irau ikisi muul maau. *Ro 8:2; 2Kor 3:17; 1Pe 4:1*

<sup>8</sup> Tauto iit taghur ila tovene: Ighaze tala toman Kriisi pa mateenj toni, nene pale itinja Kriisi taneep mataad iyaryaar paam. *Ro 8:11; 2Tim 2:11*

<sup>9</sup> Iit tawatag: Maaron ipamundigin Kriisi pa mateenj wa, ve irau imaat muul maau. Tauto mateenj injini muul maau. *Mbanj 2:24; Syg 1:18*

<sup>10</sup> Pasa, ye imaat pa sosor toit pa ee moghon, ve isob. Irau imaat muul maau. Ve aazne, ye ineep pa igham uraat itaghon Maaron lolo ve ngar toni. *Hib 7:27, 9:28; 1Pe 3:18*

<sup>11</sup> Yam tovene paam. Agham ngar aghaze: “Yei to ninim Yesu Kriisi le, nipul ngar samia wa. Yei ninimale yes mateenja to irau tigham ngar samia muul maau. Ve aazne, nineep pa ghamuunj uraat itaghon Maaron lolo ve ngar toni.” *2Kor 5:14+; Ga 2:20; Kol 3:3+*

<sup>12</sup> Yam awatag: Muri, yam pale amaata. Tovenen apul samia igham pooz payam malep. Pale ighereb gham ve ataghon ngar samia to lolomim igham pani. *Mbo 119:133*

<sup>13</sup> Anjin poian anonjamim babaña tisob, inimale matamim, avomim, nimamim ma venen. Apul di tinim mbesoonja pa ngar samia muul malep. Muunj, yam aneep animale yes mateenja. Ve aazne, Maaron ipamundigin gham ve agham nepoon paghu ila toni wa. Tovenen aghur taumim anim le kat. Ve aghur anonjamim babaña tisob tinim ye

le paam, leso tinim mbesoonja pa ngar denja. *Ro 12:1; 2Kor 5:14+; Kol 3:5*

<sup>14</sup> Pasa, yam aneep ila tutuun samba muul maau. Yam aneep ila poia to Maaron samba. Tovenen samia irau igham pooz payam muul maau. *Ro 7:4+; Ga 5:18; 1Yo 3:6*

*Iit tanim mbesoonja pa ngar samia muul maau*

<sup>15</sup> Vena? Ighaze iit taneep ila tutuun samba muul maau, ve taneep ila poia to Maaron samba, pale mataad sorok pa ghamuun ngar samia? Maau kat! *Ro 6:1; 1Pe 2:16; 1Yo 3:9*

<sup>16</sup> Yam awatag maau? Ighaze aghur taumim ila tamtoghon eta samba ve ataghon ngar toni, yam anim mbesoonja toni. Ighaze anim mbesoonja pa ngar samia, nene pale ighereb gham pa mateen ve alalemim. Eemoghon ighaze anim mbesoonja pa Maaron, ve ataghon ngar toni, nene pale ighereb gham pa ghamuun ngar to denja ila ye mata. *Yo 8:34; 2Pe 2:19*

<sup>17</sup> Muun, yam anim mbesoonja pa ngar samia ve ngar tonowen igham pooz payam. Eemoghon iit tapait Maaron! Pasa, sawa to tipatoot gham pa saveen to Krisi, ve tighur gham aneep ila saveen tonowen samba, yam aghur ila, ve aghaze ataghoni kat toman lolomim. <sup>18</sup> Sawa tonenen, Krisi ipas gham avot pa samia tapiri, ve anim mbesoonja pa ngar denja. *Yo 8:32; Ro 8:2*

<sup>19</sup> You nasavia ataam to Krisi iza to ngar to yes mbesoonja tinghamghami, leso iraurau payam pa agham ngar pani. Aghita. Muun, yam apul anonjamim babanja naol tinim mbesoonja pa ngar samia. Tauto amalaan pa tutuun to Maaron, ve agham ngar naol to tingalaan maau. Ve aazne,

yam irau ataghon ngar raraate, ve apul anonamim babanja tisob tinim mbesoonja pa ngar denja to Maaron. Leso anim ye le kat, ve ataghon ngar patabuanj moghon. *Ro 12:1*

<sup>20</sup> Sawa to yam anim mbesoonja pa ngar samia, ngar denja igham pooz payam maau. <sup>21</sup> Vena? Ngar to aghami pa sawa tonenen, igham anonja poia eta ivot payam? Maau kat. Aazne, matamim injal imuul ila pani, ve mayamim. Pasa, ngar tovene pale igham ghiit tamaat ve talaleed. *Ro 8:13; Pil 3:19*

<sup>22</sup> Eemoghon aazne, Maaron ipas gham avot pa samia tapiri, ve ngar tonowen igham pooz payam muul maau. Ve yam anim mbesoonja to Maaron wa. Tauto aghita anonja poia tovene: Yam ataghon ngar patabuanj ve anim Maaron le kat. Ve muri, yam pale agham nepoonj poia ila toni itaghoni taghoni gha ila. *1Pe 1:9*

<sup>23</sup> Ngar samia atia, nene mateenj. Eemoghon iit to taneep tunja ila to Tiina toit Yesu Krisi, Maaron igham poian ghiit, ve igham leed nepoonj poia to pale iseenga itaghoni taghoni gha ila. *Mbnp 2:17; Ezek 18:4; Yo 3:16; Ro 5:12; Yems 1:15*

## 7

*Taneep ila ataam to tutuunj muul maau. Maaron Avuvu to igham pooz pait*

<sup>1</sup> Yam tonvetaz, tutuunj ngara, yam awatagi wa. Tutuunj injin yes to tineep matadi iyaryaar moghon. Ve yes mateenja, nene tutuunj le saveenj eta padi maau. <sup>2</sup> Agham ngar pa ndiliva vaivainja. Tutuunj isaav ighaze: Yes irau tineep toman ndizwadi le ndizwadi timaat. Eemoghon sawa to

ndizwadi timaat, tutuun to vaiuun ingin di muul maau.

*1Kor 7:39*

<sup>3</sup> Tovenen ighaze liva eta azuwa inepneep, ve liva tonenen ipuli, ve ila igham tamoot paghu, nene pale tiwaata tighaze ye liva to ghuruun maat. Ve ighaze azuwa imaat, ve liva tonenen ila ivai muul, nene irau tiwaata tovene maau. Pasa, mateen to azuwa irab motin vaiuun todi, ve tutuun to vaiuun ingini muul maau.

*Mt 5:32; Lu 16:18*

<sup>4</sup> Yam tonjvetaz, ngar raraate moghon to ivot payam paam. Pasa, yam to ala toman Krisi pa mateen toni, aazne aneep ila ataam to tutuun muul maau, ve anim tamtoghon ite le wa. Nene ngeu to Maaron ipamundigini pa mateen, lesu tagham ngar popoia naol tivot pa Maaron.

*Ro 6:3; Ga 2:19+, 5:18+*

<sup>5</sup> Muun, sawa to lolood mungina ighamgham pooz pait, tutuun ipazaagh ghiit pa ghamuun ngar samsamia naol. Tauto anonaad babana ini-male mataad, avood, nimaad, ma venen, tigham ngar samsamia naol. Ngar tovene to igham ghiit tamaat.

*Ro 6:21; Ga 5:19*

<sup>6</sup> Ve aazne, iit talup toman Krisi pa mateen toni. Tauto ye ipas ghiit pa ataam to taghoniin tutuun. Ataam mungina to tutuun to timbooda, nene iit tanim mbesoona pani muul maau. Tapuli wa. Ve aazne tambesmbes pa Maaron itaghon ataam paghu to Avuvu Patabuan.

*Ro 6:4, 8:2+; 2Kor 3:6*

*Tutuun ipamundigin ngar toit, lesu taghilaal sosor toit*

<sup>7</sup> Ighaze venen, pale tasaav vena? Tutuun, nene mbeb samia? Maau kat! Tutuun, nene mbeb poia. Ighaze tutuun ineep maau, pale naghilaal

osor tiou vena? Aghita. Tutuun to Maaron isaav ighaze: “Lolom igham pa nditam mbeb todi malep.” Tauto naghilaal naghaze ngar tovene, isosor. Ve inimale tutuun tonene ineep maau, tone nakankaan pa ngar tonene. *Igham 20:17; Ro 3:20*

<sup>8</sup> Eemoghon tutuun tonene inim ataam pa ngar samia, ve ipazaagh ghou ve lolog igham pa mbeb naol. Ve inimale tutuun tovene ineep maau, tone samia tapiri isob. <sup>9</sup> Tovenen sawa to nakankaan pa tutuun to Maaron, you naneep poia. Ve sawa to tutuun ivot ve nawatagi, nene ipamundigin ngar samia ila lolog. <sup>10</sup> Tauto igham ghou naneep sagan pa Maaron, ve irab ghou namaat. Aghita. Tutuun to Maaron ighuri leso tagham nepoon poia, tauto igham mateen ivot payou. *Mbnp 2:16-3:7; Wkp 18:5*

<sup>11</sup> Pasa, tutuun tonowen inim ataam pa ngar samia. Tauto itombaan ghou, ve irab ghou namaat. *Mbnp 3:13*

<sup>12</sup> Eemoghon tutuun, nene mbeb patabuan. Ve ngar to tutuun isavia ne paam. Nene patabuan, denja, ve poia. *Mbo 19:7+; 1Tim 1:8*

<sup>13</sup> Vena, mbeb poia tonowen, to irab ghou namaat? Maau kat! Ngar samia to irab ghou namaat. Aghita. Tutuun to mbeb poia, nene inim ataam pa ngar samia, tauto irab ghou namaat. Pasa, ngar samia ighereb ghou namalaan pa tutuun, tauto inim pughu pa Maaron ighur atia payou ve namaat. Nene ipatoonja ighaze ngar samia, nene mbeb samia le samia kat. *Ro 6:23*

*Lolood munġina iponpoon ghiit pa ghamuun nġar poia*

<sup>14</sup> Iit tawatag: Tutuun, nene itaghon nġar to Maaron Avuvu. Eemoghon you tamtoġhon to taan, ve lolog munġina inepneep toman ghou sone. Tauto nepoon tiou to aazne, nene inimale samia ighol ghou ve nanim mbesoonġa pani. *Mbo 51:5; Ro 3:9, 6:15*

<sup>15</sup> You nakankaan pa nġar to naghamghami ne. Pasa, nġar to naghaze nataghoni, nene naghami maau. Ve nġar to lolog pani maau kat, tauto naghamghami. *Ga 5:17; 1Yo 1:8+*

<sup>16</sup> Nġar samia to naghamghami, ighaze lolog pani maau, nene ipatoonġ ghou ighaze taug nayok pa tutuun to Maaron naghaze nene mbeb poia.

<sup>17</sup> Tovenen nġar samia to naghamghami, taug lolog ve naghami maau. Samia to inep ila lolog, tauto ipapazaagh ghou ve naghamghami. <sup>18</sup> You nawatag: Nġar poia eta inep ila lolog maau. Nene nasavia lolog munġina. Pasa, lolog naghaze le naghām nġar popoia moghon. Eemoghon naraua maau. *Mbnp 6:5, 8:21*

<sup>19</sup> Nġar popoia to naghaze naghām di, nene naghām di maau. Ve nġar samsamia to lolog padi maau kat, tauto naghāmghām di. <sup>20</sup> Nġar samsamia to naghāmghām di ne, ighaze lolog pa naghām di maau, nene ipatoonġ ghou ighaze taug lolog ve naghām di maau. Samia to inep ila lolog, tauto ipapazaagh ghou ve naghāmghām di.

<sup>21</sup> You naghita nġar tonene ivotvot payou. Sawa to naghaze naghām nġar poia eta, nġar samia inepneep ila nġar tonenen lolo. <sup>22</sup> You lolog pa Maaron

tutuun toni kat, ve naghaze le nataghoni kat. *Mbo 119:35*

<sup>23</sup> Eemoghon naghilaal ngar ite ineep ila lolog paam, ve ighamgham pooz pa anonag babanja in- imale matag, avog, nimag, ma venen. Ngar tonene toman tutuun to Maaron to ngar tiou iyaryaan pani, nene tipaparab irau sawa isob. Ngar samia tonene ikis katin ghou ve ighamgham pooz payou. Irau ipul ghou maau. *Ga 5:17; Yems 4:1*

<sup>24</sup> Oyai, nakaria taug wa. Atia to ngar samia tonene, nene mateen! Sei to pale ipas ghou navot pa pataani tonene? *Ro 6:6, 8:2*

<sup>25</sup> You lolog poia pa Maaron ve napaiti pa poia toni. Pasa, ila Tiina toit Yesu Krisi uraat toni, ye pale iuul ghou. *Yo 8:36; 1Kor 15:57*

Tovenen ngar tiou naghaze nanim mbesoonja pa Maaron, ve nataghon tutuun toni. Eemoghon lolog mungina tapiri tiina, tauto nanim mbesoonja pa ngar samia.

## 8

*Nepoon to yes to titaghon pooz to Maaron Avuvu*

<sup>1-2</sup> Saveen naol to nasavia ila wa, nene pughu tovene: Iit to taneep tunja ila to Yesu Krisi, aazne leed pughu eta pa Maaron ighur atia pait maau. Pasa, Maaron Avuvu to taghamgham nepoon poia ila toni, tapiri ipas ghiit pa ngar samia ve mateen tapiri wa. *Yo 8:36; Ro 6:18, 8:33+*

<sup>3</sup> Tutuun, nene irau ipas ghiit tavot pa samia ve mateen tapiri, ve igham ghiit taneep denjaad ila Maaron mata ne maau. Pasa, lolood mungina, nene irabrab matin tapiriid. Eemoghon mbeb

to tutuun irau ighami maau, tauto Maaron tau ighami. Pasa, ye imbaan tau Natu izi inim taan, ve igham nepoon inimale iit tamtoghon samsami-aad, ve tini iyabyab, ve imaat inim watoonrau pa ireu sosor toit. *Mban 13:38+; Ro 7:18; 2Kor 5:21; Hib 10:1+*

<sup>4</sup> Ye igham tovene, leso tagham ngar denja to tutuun isavia. Nene nasavia iit tamtoghon to tataghon ngar to lolood munjina maau, ve tataghon pooz to Maaron Avuvu. *Ro 3:31, 13:10; Ga 5:16,25*

<sup>5</sup> Tamtoghon to titaghon lolodi munjina, yes matadi ingalngal ngar samsamia to lolodi munjina moghon. Eemoghon yes to titaghon pooz to Maaron Avuvu, matadi ingalngal mbeb ve ngar to Maaron Avuvu. *Yo 3:6; 1Kor 2:14+; Ga 5:19+*

<sup>6</sup> Tamtoghon to matadi ingalngal ngar to lolodi munjina, titaghon ataam to mateen. Ve yes to matadi ingalngal mbeb ve ngar to Maaron Avuvu, nene tigham nepoon poia ila to Maaron, ve tineep toman lolodi luuma. *Ro 5:1, 6:21+; Ga 6:8*

<sup>7</sup> Ighaze tamtoghon eta ngar toni iyaryaan ighaze itaghon lolo munjina, nene ye ighur koi pa Maaron. Tamtoghon tovene, lolo pa ineep ila tutuun to Maaron samba maau. Ighaze itoova pa itaghoni, nene pale iraua maau. <sup>8</sup> Tovenen yes to titaghon lolodi munjina, nene irau tigham Maaron lolo poia ne maau. Maau le maau kat.

<sup>9</sup> Eemoghon yam ataghon ngar to lolomim munjina muul maau. Pasa ighaze onoon Maaron Avuvu ineep ila lolomim, ye pale igham pooz payam. Ve tamtoghon to ighaze Krisi Avuvu ineep ila lolo maau, nene ye tamtoghon to Krisi maau.



*1Kor 3:16, 6:19; Ga 5:22+*

<sup>10</sup> Onoon, sosor toit to inim pughu pa iit tasob tamatmaat. Eemoghon ighaze Krisi ineep ila lolomim, yam pale agham nepoon poia ila to Avuvu Patabuan. Pasa, Krisi igham gham aneep denjamim ila Maaron mata wa. <sup>11</sup> Ve ighaze Maaron toit to ipamundigin Yesu Krisi pa mateen ne Avuvu ineep ila lolomim, ye pale ipamundigin gham paam pa mateen ila Avuvu tonowen tapiri, ve aneep matamim iyaryaar toman anonamim paghu. *Ro 6:5; 1Kor 6:14; 2Kor 4:14*

*Avuvu Patabuan igham ghiit taghilaal taghaze tanim Maaron ndinatu*

<sup>12</sup> Tovenen yam tonvetaz to Krisi, yam lemim pughu eta pa ataghon ngar to lolomim mungina muul maau. Yam irau ataghon ngar to Avuvu Patabuan. *Ro 6:14*

<sup>13</sup> Pasa, ighaze ataghon ngar to lolomim mungina, nene pale amatmaat ve alalemim. Ve ighaze agham tapirimim ila to Avuvu Patabuan, ve arabrab matin ngar samsamia to lolomim mungina, nene pale agham nepoon poia ila to Maaron. *Ro 6:23; Ga 5:24, 6:8; Kol 3:5+*

<sup>14</sup> Pasa, tamtoghon tisob to titaghon pooz to Maaron Avuvu, to tinim Maaron ndinatu. <sup>15</sup> Avuvu to Maaron igham payam, ye irau igham gham anim yes mbesoonja sorok to timatughez pa daba todi ne maau. Ye Avuvu to igham ghiit tanim Maaron ndinatu. Ve ye to igham ghiit tapoi

Maaron taghaze: “Abba,\*  
Tamañ!”

*Ga 4:6; 2Tim 1:7*

<sup>16</sup> Tovenen Avuvu Patabuañ tau isavsaav pait ila lolood, ve ipariaañ ghiit, lesu taghur ila taghaze iit Maaron ndinatu.

*Yo 1:12; 2Kor 1:22*

*Muri pale tala taneep toman Maaron ila nguruba lolo*

<sup>17</sup> Ighaze iit Maaron ndinatu, nene izaad pa ghamuñ mbeb popiadi naol to Tamaan Maaron ighaze irei di pa tamtoghon toni. Ve iit moghon maau. Itiña Kriisi pale tagham mbeb tonowen. Eemoghon iit irau tambaad patañani pa Kriisi iza, ghoru muri itiña Kriisi taneep poia ila nguruba lolo izi ndug sambam. *Ga 3:29, 4:7; Pil 1:29; Syg 21:7*

<sup>18</sup> Patañani naol to aazne tivotvot ne, you naghita di tinimale mbeb sorok. Pasa, sawa to Maaron ipatoon nguruba toman tapiri ve poia toni pait izi ndug sambam, mbeb tonowen pale ilib kat pa patañani toit tisob. *2Kor 4:17*

<sup>19</sup> Aazne, mbeb tisob to Maaron ighur di, tiñazuuva ve tighurghur matadi pa Maaron tighaze le rikia moghon ve tighita katin sawa to ye ipatoon ndinatu tivot tighazon. *Kol 3:4; 1Yo*

*3:2*

<sup>20-21</sup> Aazne, taghita mbeb naol to Maaron ighur di, tineep pooli maau. Tisasami rikia, ve uraat todi ilaan denja kat itaghon Maaron ngar toni maau. Mbeb tonowen titaghon taudi lolodi ve tigham tovene maau. Maaron tau ipul di tila samia nima,

---

\* **8:15:** Yes Israela ndinatudi geegeu tipoipoi nditamandi tighaze: ‘Abba,’ inimale iit ndinatuud tipoipoi nditamandi tighaze ‘Aman.’ Yesu paam ipoi Tama Maaron ighaze ‘Abba.’ Ughita Mk 14:36.

tauto tisami. Eemoghon ye igham ngar padi paam ighaze muri, ye pale igham mulin di paam, ve ipas di tivot pa samia tapiri. Leso tinim paghu ve tineep pooi ila nguruba lolo, tinimale iit to tanim ye ndinatu. *Mbnp 3:17+; 2Pe 3:13; Syg 21:1*

<sup>22</sup> Iit tawatag: Muun ve inim aazne, mbeb ti-sob to Maaron ighur di, tiyamaan yabyabuun ve tiyakyak tinimale liva to ighaze ipoop. <sup>23</sup> Ve yes moghon maau. Iit paam. Onoon, Maaron igham tau Avuvu pait wa. Nene inim pughu pa mbeb popoia naol to muri pale tagham di. Eemoghon aazne, taneep toman patañani ve tatañañ, ve tasasañan sawa to pale Maaron ipas ghiit tavot pa samia tapiri, ve igham leed anoñaad paghu. Sawa tonenen ighaze ivot, ghero ye ipatoon ghiit ighaze: “Nene you ndinatug.” *2Kor 5:2+; Pil 1:23, 3:21*

<sup>24</sup> Onoon, Maaron igham mulin ghiit wa. Eemoghon taghita katin anoña sone. Tauto aazne, taghurghur mataad pani ve tanepneep. Ve inimale anoña ivot wa, tone irau taghur mataad pani muul maau. Pasa, ighaze mbeb eta anoña ivot, sei pale ighur mata pani muul? *2Kor 5:7*

<sup>25</sup> Nepoon poia to taghurghur mataad pani ne, iit taghita katini sone. Eemoghon iit tawatag: Maaron pale igham pait. Tauto tayoona ariana, ve tasasañan moghon. *Hib 11:1*

### *Maaron Avuvu ipasalungan sunjuun toit*

<sup>26</sup> Onoon, iit tamtoghon to taan, tapiriid imbool. Ve sawa naol, takankaan: Pale tasun vena, lesa sunjuun toit denja pa Maaron ngar toni. Ve ngar pida to ineep ila lolood, nene ipatana pa tasavia ila sunjuun toit. Eemoghon Avuvu Patabuan iuluul

ghiit, ve ipasalungan sunjuun toit inajarua Tamaan Maaron. *Yo 14:16; Ep 6:18*

<sup>27</sup> Maaron itirtiir iit tasob lolood, ve iwatag Avuvu Patabuan ngar toni paam. Ye iwatag: Sawa to Avuvu Patabuan ighur iit tamtoghon to Maaron ila sunjuun toni, ye isunjuun itaghon Maaron lolo.

*Mbeb eta irau iwaghamun ghiit kat ne maau*

<sup>28</sup> Iit tawatag: Mbeb tisob to tivotvot, nene Maaron itortoor di tinim mbeb popoia pa yes to lolodi pani. Nene yes to ye ipoi di tinim le itaghon tau ngar toni. *Mbnp 50:20; 2Tim 1:9*

<sup>29</sup> Pasa, yes to ye tau isia di pataghaan, tauto ngar toni iyaryaan padi ighaze igham uraat padi ve itoor di lee tigham katin ngar to Natu Yesu Krisi. Leso ye inim aidaba, ve imuun pa nditazi ve ndilivu katindi tonowen. *2Kor 3:18; Ep 1:5; Kol 1:15+; 1Pe 1:2*

<sup>30</sup> Ve yes to Maaron ngar toni iyaryaan padi, tauto ipoi di tinim le. Ve yes to ipoi di tinim le, tauto igham di tineep denjadi ila mata. Ve yes to igham di tineep denjadi ila mata, nene ye pale ikis di tineep tunja ila toni ila ila le igham di tila tineep tomani ila nguruba lolo izi ndug sambam. *Yo 10:27+; 1Kor 6:11*

*Mbeb eta irau irab motin ghiit pa Maaron maau*

<sup>31</sup> Laak, ighaze Maaron igham tovene pait, pale tasaav vena? Ighaze ye tau ivool toit, sei irau iwaghamun ghiit? Maau. *Mbo 56:4; Hib 13:6*

<sup>32</sup> Aghita. Maaron inguruut tau Natu pait maau. Ye ipuli izi inim taan, ve igham inaad ve imaat pait. Ighaze venen, Maaron pale igham leed mbeb

toni popoia to naol ne, raraate inimale igham Natu pait. *Yo 3:16*

<sup>33</sup> Ve iit tamtoghon to Maaron isia ghiit tanim le, sei pale ipayoon ghiit pa savsaveen? Maau. Pasa, Maaron tau igham ghiit taneep denjaad ila mata wa. *Is 50:8+*

<sup>34</sup> Ve sei pale ighur atia pait pa sosor toit? Maau. Pasa, Yesu Krisi imaat pa sosor toit, ve Maaron ipamundigini pa mateen wa. Ve aazne, ye inepneep ila Maaron nima waan, ve sunjuun toni inajarua Tama pait. *Mbo 110:1; Ro 8:1; Hib 7:24+; 1Yo 2:1*

<sup>35</sup> Aghita. Krisi lolo inep toit kat. Tovenen sa mbeb irau irab motin ghiit pani? Maau. Patañani naol naol to tivotvot pait inimale taneep sami, ma tamtoghon tighur patañani pait pasa, tataghon Krisi, ma pitool ghiit, ma mbolaan igham ghiit, ma timbut ghiit pa buza, ma patañani ite paam, mbeb eta tovene irau irab motin ghiit pa Krisi maau. <sup>36</sup> Onoon, patañani naol tonene tivotvot pait. Saveenja timbooda pataghaan tovene:

“Yei ninim lem wa. Tauto sawa isob, tirabrab sorokin ghei nimatmaat.

Yes tighita ghei ninimale sipsip to timbit di pa tirab di.” *Mbo 44:22; 1Kor 4:9, 15:30+*

<sup>37</sup> Eemoghon patañani naol tonene irau tiwaghamun ghiit maau. Pasa, Krisi lolo pait kat, ve igham ghiit talib padi. *Yo 16:33; 1Kor 15:57; 2Kor 2:14; 1Yo 4:4; Syg 12:11*

<sup>38-39</sup> Tovenen you naghur ila kat tovene: Iit to taneep tunja ila to Tiina toit Yesu Krisi, Maaron lolo inep toit kat, ve mbeb eta irau irab motin ghiit pani maau. Mateen, ma nepoonaad to taan, anjela eta, avuvu samia eta, mbeb to ledi tapiridi

tintina, ngar to aazne ivotvot, ngar to muri pale ivot, mbeb to tineep sala, ma mbeb to tineep sila kat, mbeb tisob to Maaron ighur di, eta irau irab motin ghiit pa Maaron toit to lolo pait kat ne maau. Maau le maau kat.

## 9

*Paulus lolo ipatanan kat pa yes Israela to tighur ila to Krisi maau*

<sup>1</sup> Saveenj to you naghaze nasavia, nene kaarom maau. Nene saveenj onoon, ve nasavia toman lolog. Pasa, you tamtoghon to Krisi. Ve Avuvu Patabuanj to ighamgham pooz payou ne, ye igham ghou nayamaan taug naghaze saveenj tonene, nene onoon moghon. <sup>2-3</sup> Sawa isob, you naneep toman lolog ipatanan kat ve natantan pa yes Israela. Pasa, yes tamtoghon tiou, ve pughu tiei ee moghon. Tovenen lolog iyaryaanj kat naghaze Maaron igham mulin di, ghoru poia. Ighaze Maaron irau ipaghau mbalmbali toni padi, ve ighuri iza tiou, nene poia moghon. Onoon kat, ighaze ataam ite paam ineep maau, you irau nayokia taug ve Maaron irab motin ghou pa Krisi ve nalaleg, leso nauul di. *Igham 32:32; Ro 10:1*

<sup>4</sup> Yes Israela, Maaron igham mbeb popoiadi naol padi. Ye igham di tinim ndinatu. Ve muun, inepneep ila lolodi, ve ipatoonj tapiri ve poia toni padi. Pae katindi, Maaron imbua saveenj toman di, leso tilup di tinim ee moghon. Yes to tigham tutuun toni. Ve Maaron ipatoonj sunuun ngara padi leso titaghoni ila rumai lolo, ve imbua saveenj toman di pa mbeb naol. *Mbnp 17:2, 28:14+; Igham 4:22, 19:5*

<sup>5</sup> Yes tivot ila to nditimbudi Abaram, Isak, ve Yakop. Ve sinj todi tonowen iseengga inim inim le aazne Krisi ivot ila todi. Krisi, ye Maaron, ve mbeb tisob tineep ila ye samba. Tovenen iit irau tapait iza pa poia toni itaghoni taghoni gha ila. Onoon. *Mt 1:1+; Yo 1:1; Ro 1:3+, 11:28*

*Abaram papaghu toni pida, yes Israela kat. Ve pida maau*

<sup>6</sup> Onoon, aazne Israela katindi tighur ila to Krisi maau. Tovenen pale tasaav vena pa saveen to Maaron imbua toman nditimbudi? Saveen tonowen inim yaghur sorok? Maau. Pasa, tamtoghon to tivot ila to yes Israela, tisob tinim Israela kat maau. *Yo 8:39+; Ro 2:28+*

<sup>7</sup> Ve Abaram papaghu toni tovene paam. Yes to tivot ila to Abaram, tisob tinim papaghu toni kat maau. Pasa, muun, Maaron isaav pa Abaram ighaze:

“Papaghu tiom kat pale tivot ila to natum Isak moghon.” *Mbnp 21:12*

<sup>8</sup> Saveen tonene, ngara tovene: Yes to tivot ila sinj to Abaram, tisob tinim Maaron ndinatu maau. Yes to tivot titaghon saveen mbuaan toni, nene yes moghon to ye ighita di ighaze ye ndinatu. *Ga 3:29, 4:23,28*

<sup>9</sup> Pasa muun, Maaron imbua saveen toman Abaram ighaze:

“Sawa tonene ighaze ivot muul pa ndaman muri, you pale namuul nanim. Ve sawa to navot sone, azuwam Sara pale ipoop lem natum tamoot.” *Mbnp 18:10,14*

*Maaron isia tamtoghon tinim le itaghon tau lolo*

<sup>10</sup> Ve tonene moghon maau. Matamim ingal imuul ila pa timbumai Isak ve azuwa Rebeka paam. Rebeka ipoop booga ru. <sup>11-12</sup> Sawa to ipoop ndinatu ru tonowen sone, Maaron isaav pani ighaze:

“Muri, natum aidaba pale inim mbesoonja pa ngeu muria.” *Mbnp 25:23*

Sawa to Maaron isavia saveen tonene, ndipain ru tonenen tigham ngar poia eta, ma ngar samia eta sone. Maaron igham ngar tonene, leso ipatoon ataam to ye isia le tamtoghon. Pasa, ighaze ye isia tamtoghon eta inim le, nene pughu ineep ila tamtoghon tonenen tau ngar toni, ma uraat toni eta ne maau. Maaron itaghon tau lolo ve ngar toni, ve igham tamtoghon tonenen inim le. *Ro 8:29+; Ep 2:8*

<sup>13</sup> Ve Maaron saveen toni waaro ite isavia ngar raraate moghon. Ighaze:

“You lolog pa Yakop ve naghmi pa uraat tiou. Ve Esau, you matag ila pani maau. Napuli ineep.” *Mal 1:2+*

<sup>14</sup> Ighaze tovene, pale tasaav vena? Maaron ngar toni denja maau? Tagham ngar tovene malep. *Lo 32:4; Mbo 92:15*

<sup>15</sup> Pasa aghita. Muun, Maaron isaav pa Mose ighaze:

“Ngar to lolog isamin tamtoghon, nene ineep to you taug. Ighaze ateg waaro tamtoghon eta ve naghaze nareu sosor toni, nene pale naghm tovene. Tamtoghon to ighaze lolog isamini ve lolog pa nauuli, nene pale nauuli.” *Igham 33:19*



16 Tovenen Maaron ighita tamtoghon lolodi ve ngar to tizuaria di pani, ve igham di tinim le ne maau. Ighaze lolo isamin tamtoghon eta, ve isia inim le, ye itaghon tau lolo. *Ep 2:8+; 2Tim 1:9; Tit 3:5*

17 Ve Maaron aliņa waaro ite to timbooda, isaav tovene: Muuņ, Maaron isaav pa kinik to yes Isipa ighaze:

“You taug naghur ghom unum kinik, leso unum ataam pa napatoon tapirig ivot ighazon, ve muri tivotia varug irau taan isob.”  
*Igham 9:16*

18 Tovenen Maaron itataghon tau lolo. Ighaze lolo pa iuul tamtoghon eta, nene pale lolo isamini ve ireu sotor toni. Ve ighaze lolo pa igham tamtoghon eta ngar toni iyaryaan kat leso izoor ye aliņa, ye irau igham tovene paam. *Igham 4:21, 7:3; Yo 12:40; Ro 11:25*

### *Mbalmali to Maaron ve poia toni*

19 Tamtoghon tiam eta pale ighason ghou ighaze: “Wai, ighaze Maaron ighamgham tovene, pughu vena to ye ighaze iit leed sotor pa ngar toit samsamia? Ighaze ye lolo pa ngar eta ivot, sei irau izoora?”

20 Ve you pale napamuul ghasoniin toni tovene: “Yom sa ngeu to ughaze urere Maaron pa ngar toni? Vena, uur eta irau isaav pa tamtoghon to igharaata ighaze: ‘Pughu vena to yom ugharaat ghou tovene?’ ” Nene maau. *Is 45:9, 64:8*

21 Tamtoghon to gharatoon uur ighagharaat di itaghon tau lolo. Pasa, ye iza pa uraat tonowen. Tovenen ye irau igham taan ndouņ eez inim, ve igharaat pida inim uur poia kat, leso ineep pa

uraat tintina. Ve pida, ye igharaata inim uur to ineep pa uraat soroksorok. *2Tim 2:20*

<sup>22</sup> Maaron ighamgham tovene paam. Ye ighaze ipaghazonan tamtoghon pa tapiri, ve ipatoon mbalmbali toni pa ngar samia. Tauto ighur tamtoghon pida, leso mbalmbali toni iza todi ve tilaledi. Eemoghon ye iwaghamun di rikia maau. Itatan ate, ve isasaan di. <sup>23</sup> Ve ye ighaze ipaghazonan tamtoghon pa iza tiina ve poia toni paam. Tauto tamtoghon pida, ye ighur di, leso lolo isamin di ve igham di tila tineep tomani ila nguruba lolo. <sup>24</sup> Nene nasavia iit to Maaron ipoi ghiit tanim le. Iit Yuda, ve yes to Yuda maau ne paam. <sup>25</sup> Saveeja, propet Hosea isavia muun wa. Ighaze:

“Yes to tamtoghon tiou maau, you pale nawaat di naghaze ‘tamtoghon tiou.’ Ve yes to muun lolog padi maau, you pale nasaav padi naghaze: ‘You lolog payam kat.’ *Hos 2:23; 1Pe 2:10*

<sup>26</sup> Ve ndug to muun tamtoghon tineep pani, ve Maaron isaav padi ighaze: ‘Yam tamtoghon tiou maau,’ ndug tonowen tamtoghona, to pale tiwaat di tighaze Maaron mata yaryaara ndinatu.” *Hos 1:10*

<sup>27</sup> Isaia paam ivotia saveeja inarua yes Israela ighaze:

“Onoon, yes Israela, tamtoghon todi ndinndin ndinndin tinimale magargaar to te. Eemoghon tamtoghon todi to you pale nagham mulin di, yes ival maau. Enaena moghon.” *Mbnp 22:17; Is 10:22+; Ro 11:5*

<sup>28</sup> Pasa, Maaron irau isaan maau. Atia to ye ighaze ighuri pa tamtoghon to taan, ye pale

igham uraata rikia moghon, ve ighuri isob iza todi. <sup>29</sup> Nene itaghon saveenj waaro ite to muunj propet Isaia ivotia. Ighaze:

“Inimale Maaron ariana ighurghur tamtoghon toit pida maau, tone iit tasob talaleed tanimale yes Sodoma ve Gomora.”  
*Is 1:9*

### *Yes Israela tiyel pa ataam to ghurla*

<sup>30</sup> Tovenen pale tasaav vena? Ndug ndug to muunj tizuaria di pa tineep denjadi ila Maaron mata maau, tauto aazne tighur ila to Krisi, ve ye igham di tineep denjadi ila Maaron mata wa. *Ro 1:16+, 3:22, 4:5; Ga 2:16; Pil 3:9*

<sup>31</sup> Eemoghon yes Yuda to tizuaria di tighaze le titaghon katin tutuunj to Mose, lesu tineep denjadi ila Maaron mata, nene yes titoova le tiraua maau. *Ro 10:2+, 11:7; Ga 5:4*

<sup>32</sup> Pasa, lolodi pa titaghon ataam to ghurla maau, ve tighaze uraat ve ngar popoia to tighamgham di, nene pale igham di tineep denjadi ila Maaron mata. Tauto tinim tamtoghon to itut aghe ila yaam, ve itap izi. *Lu 2:34; 1Kor 1:23*

<sup>33</sup> Ngar to tighami, saveenja timbooda pataghaan wa. Isaav tovene:

“Aghita. You naghur yaam eez ineep izi lolooz Zion.

Yaam tonowen, tamtoghon pida pale titut aghedi ila, ve titap tizi.

Eemoghon tamtoghon tisob to tighur ila toni, nene pale tighita ghurla todi anona. Eta irau ighur mata pani sorok ve maya ne maau.” *Mbo 118:22; Is 8:14, 28:16; Pe 2:6+*

# 10

*Yes Israela tighazoon pa Maaron ataam toni sone*

<sup>1</sup> Yam tonvetaz, you naghams ngar tiina kat pa yes Israela naghaze le Maaron igham mulin di, ghoropoia. Tauto sawa isob, sunjuun tiou injarua Maaron padi. *Ro 9:3*

<sup>2</sup> You nawatag katin di, tovenen you irau nasavia gabuadi. Onoon, ngar todi iyaryaan kat tighaze le titaghon katin ataam to Maaron. Eemoghon tighazoon kat pa Maaron lolo ve ngar toni maau. Tauto tiyel pa ataam toni. *Mban 21:20*

<sup>3</sup> Pasa, ataam to Maaron igham ghiit taneep denjaad ila mata, nene tighilaala sone. Tauto tizurun ataam toni tonowen, ve tiyoon ila ataam to taghoniin tutuun tighaze ngar tonowen pale igham di tineep denjadi ila Maaron mata. *Ro 9:31+; Pil 3:9*

<sup>4</sup> Eemoghon Krisi igham tutuun to Mose anonja ivot wa. Tauto ataam to taghoniin tutuun inim imuul izi toni. Pasa, tamtothon tisob to tighur ila toni, ye igham di tineep denjadi ila Maaron mata. *Mt 5:17; 2Kor 3:6; Ga 3:24+; Hib 8:13*

*Ataam to taghur ila, lesotaneep denjaad ila Maaron mata*

<sup>5</sup> Ataam to taghoniin tutuun lesotaneep denjaad ila Maaron mata, nene ipatanan. Muun, Mose imbood saveenja ighaze: “Tamtothon to ighaze itaghon katin tutuun, nene pale ineep pooli.” *Wkp 18:5; Lu 10:27+; Ga 3:12*

<sup>6</sup> Ve ataam to taghur ila, lesotaneep denjaad ila Maaron mata, nene rauraua. Pasa, isaav pait tovene: “Usaav ila lolom ughaze: ‘Sei irau iza ila

sambam?’ Vene malep. Pasa, Maaron imbaan Kriisi izi inim taan wa. Ughaze ughami imuul izi inim pasa? <sup>7</sup> Ve usaav ughaze: ‘Sei irau izila ndug to mateenja?’ Vene paam malep. Pasa, Maaron ipamundigin Kriisi pa mateenja wa. Yom ughaze upamundigini muul pasa?’ <sup>8</sup> Saveen tonene, ngara tovene:

“Maaron saveen toni ineep mala pait maau.

Pasa, ineep ila avood ve lolood wa.” *Lo*

*30:11-14*

Laak, sa saveen? Nene saveen to yei nivovotia pa ataam to ghurla. <sup>9</sup> Saveen tonowen isaav pait tovene: Ighaze taum avom uvotia ghurla tiom ila ival tiina matadi ughaze: “Yesu, ye Tiina tiou,” ve ighaze lolom ighur ila ughaze Maaron ipamundigini pa mateenja wa, nene pale Maaron igham mulin ghom, ve uneep pooi. *Yo 3:15; Mbanj 16:31*

<sup>10</sup> Pasa, ighaze lolood ighur ila, nene pale Kriisi igham ghiit taneep denjaad ila Maaron mata. Ve ighaze tauud avood tavotia ghurla toit ila ival tiina matadi, nene pale Maaron igham mulin ghiit ve taneep pooi.

<sup>11</sup> Pasa, Maaron aliija to timbooda, isaav tovene:

“Tamtoghon tisob to tighur ila toni, nene pale tighita anonja to ghurla todi ve Maaron igham mulin di. Eta irau ighur mata pani sorok ve maya ne maau.” *Is 28:16; Ro 9:33*

<sup>12</sup> Saveen tonene inarua tamtoghon tisob. Yes Yuda, ve yes to Yuda maau ne paam. Pasa, Maaron ee moghon ineepneep. Ye Tiina to iit tasob. Ve ye ighurghur poia toni tiina izaza to tamtoghon tisob to tighasoni pa ulaan. *Mbanj 10:34+; Ro 3:22,29; Ga 3:28*

13 Pasa, Maaron aliņa isaav ighaze:

“Tamtoġhon tisob to tighason Maaron pa ulaaņ, ye pale igham mulin di ve tineep pooi.” *Yoel 2:32; Mbaņ 2:21*

*Yes Israela ledi pughu eta pa tizurun Krisi maau*

14 Eemogħon ighaze tamtoġhon tighur ila to Maaron maau, nene pale tighasoni pa ulaaņ vena? Ve ighaze tilooņ varu maau, pale tighur ila toni vena? Ve ighaze ledi tamtoġhon eta pa ivotia mos padi maau, pale tilooņ Maaron varu vena? *Mbaņ 8:30+*

15 Ve ighaze timbaaņ yes uraata tila maau, pale tivotia mos pa tamtoġhon vena? Pasa, Maaron aliņa to timbooda, isaav tovene:

“Tamtoġhon tighita yes to tilagħov varu poia inim, le igham di lolodi poia.” *Is 52:7; Ep 6:15*

16 Eemogħon yes Israela tisob titagħon saveeņ to varu poia maau. Eņaeņa mogħon. Isaia isavia saveeņa muuņ wa. Ighaze:

“Tiina, sei ighur ila saveeņ to yei nivotia padi?” *Is 53:1; Yo 12:38; Hib 4:2*

17 Tovenen Maaron aliņa to taloņlooņa, tauto ipamundigin ghiit pa tagħur ila. Ve sawa to tivotia Krisi varu, tamtoġhon tilooņ saveeņ toni.

18 Ighaze venen, pale tasaav vena pa yes Israela? Tilooņ varu poia sone? Maau. Yes tilooņa wa. Pasa, Maaron aliņa isaav tovene:

“Aliņadi ila irau taan, ve saveeņ todi ilaan irau ndug tisob.” *Mbo 19:4*

19 Ma vena? Yes Israela tilooņ saveeņ tonowen, ve tikankaan pa pughu? Maau. Yes irau tighazooņ pani. Aghita. Muuņ, Mose isaav ighaze:

“Yes ndug ndug to ledi izadi maau ve ledi ngar maau, you pale naghham di tinim leg ve naghur poia tiou iza todi.

Ve yam pale aghita ngar to naghham padi, ve igham gham atemim yabyab, ve aghaze le mbeb tovene ivot payam paam, ghoru poia.” *Lo 32:21; Ro 11:11,14*

<sup>20</sup> Ve propet Isaia isaav ghazonja kat ighaze:

“Tamtoghon to tizuarua di payou maau, yes tauto tindeen ghou.

Ve yes to tighason payou maau, tauto napa-toon taug padi.” *Is 65:1; Ro 9:30*

<sup>21</sup> Eemoghon yes Israela, Isaia isavia saveen injarua di ighaze:

“Yam to taliñamim saambu maau ve azor-zoor aliñag, sawa isob you nakaak nimag ve nasasaan gham pa amuul anim tiou. Eemoghon anim maau.” *Is 65:2*

## 11

### *Maaron irau ipul muri pa yes Israela maau*

<sup>1</sup> Ighaze venen, pale tasaav vena? Maaron ipul muri pa tamtoghon toni? Maau kat! Aghita. You tamtoghon to Israel. You paghu to Abaram, ve pughu tiou ivot ila to Benyamin. *Mbo 94:14; 2Kor 11:22; Pil 3:5*

<sup>2</sup> Maaron irau ipul muri pa yes Israela maau. Pasa, ye tau isia di tinim le wa. Matamim ingal imuul ila pa kamos to propet Ilia. Maaron aliña to timbooda, isaav tovene: Ilia ivotia sosor to yes Israela ila to Maaron, ve itañ rorani ighaze:

<sup>3</sup> “O Tiina, yes tirab propeta tiom tisob timatmaat wa.

Ve artaal to tigharaat di payom, tovene paam.

Tireu di tisob timbiriis tila wa.

Tovenen aazne, you engengou kat to naneep.

Ve tizuaria di pa rabuun ghou paam.” *1King 19:10+*

<sup>4</sup> Ve Maaron ipamuul Ilia aliņa ighaze:

“Maau. Aazne, you leg tamtoghon irau

7000 to nakis di ve tiyondyood ariņa.

Tauto tiput aghedi pa maaron kaarom Baal maau.”

*1King 19:18*

<sup>5</sup> Aazne, ngar raraate ivot muul. Maaron isia yes Israela pida tinim le, itaghon tau lolo ve poia toni. Tauto tighur ila to Krisi.

*Ro 9:27*

<sup>6</sup> Ndiran tonowen, Maaron igham di tinim le, itaghon uraat ve ngar todi popoia ne maau. Ye itaghon tau lolo ve poia toni, ve igham di. Ve inimale ye igham di tinim le itaghon uraat ve ngar todi popoia, tone poia toni tonowen inim poia tau maau.

*Ro 4:4+, Ro 9:15+; Ep 2:8*

<sup>7</sup> Ighaze tovene, pale tasaav vena? Mbeb to yes Israela tizuaria di pani, ival tiina tighami maau. Tamtoghon todi enaņa to Maaron tau isia di tinim le, yes moghon to tighami. Ve yes pida, ye ipul di titaghon taudi ngar todi. Tauto ngar todi iyaryaan kat tighaze tizoor saveņ toni. *Ro 9:31; 2Kor 3:14*

<sup>8</sup> Saveņa timbooda pataghaan tovene:

“Maaron igham di lolodi imaagh pa taudi tinimale tamtoghon to igheen le lolo imaagh kat. Tauto matadi tighita mbeb, eemoghon tighilaal pughu maau. Ve talinadi tilonloon saveņ, eemoghon titaghoni maau. Ve ngar



todi tonowen isob sone. Iseenğa iseenğa ve inim aazne.” *Lo 29:3+; Is 29:10; Yo 12:40; Mbanj 28:26+*

<sup>9</sup> David paam isavia saveenj inarua di ighaze:

“Tonj to aniinj todi ineep izala, pale inim liis padi, ve inim yaam to titut aghedi ila, ve titap tizi. Leso iyat sotor todi.\* *Mbo 69:22+*

<sup>10</sup> Matadi pale ipis, ve tighilaal maau.

Ve yes pale timbaad pataņani tiina le ndimodi ikook, ve tineep tovene le alok.”

*Yes Israela tizurun Krişi, tauto ighur soso pa varu poia ila irau ndug ndug*

<sup>11</sup> Yes Israela to tighur ila to Krişi maau ne, yes tinimale tamtoğhon to itut aghe ila yaam, ve itap. Ve vena, pale tineep tovene itağhoni tağhoni gha ila? Maau. Pale timundig muul. Onoon, aazne tiyel pa ataam to Maaron. Eemoghon nğar to tighami, nene inim ataam pa Maaron igham mulin ndug ndug to Yuda maau ne. Leso yes Israela tighita nğar poia to ye igham padi, ve lolodi igham pani kat, ve timuul tila toni. *Mbanj 13:46; Ro 10:19*

<sup>12</sup> Sawa to yes Israela tiyel pa ataam to Maaron ve tipul muridi pani, nene inim ataam pa poia tiina to Maaron iza to ival tiina to taan. Pasa sawa tonenen, poia toni inarua ival tiina to Yuda maau. Ve ighaze venen, iit tawatag: Ighaze yes Israela tisob titoor nğar todi imuul ila pa Maaron, nene

---

\* **11:9:** Ndiran nğara pida tighaze saveenj to tonj, nene iza to tutuun to Maaron igham pa yes Israela. Tutuun tonowen, nene mbep poia. Eemoghon yes Israela tigham nğar tiina kat pani. Tauto ighamun nğar todi, ve tighilaal Yesu maau.

pale poia toni tiina kat iza to tamtoghon tisob, le ilib pa poia toni to muuᅇ iza todi.† *Ro 11:25*

<sup>13</sup> Yo, you naghaze nasavia saveeᅇ pida iᅇarua yam to Yuda maau. Pasa, Maaron imbaaᅇ ghou pa naghama uraat payam. Ve you naghita naghaze uraat tiou tonene, nene uraat tiina, ve uraat tau. Tovenen naghaze naghama katin uraat tiou. *Mbaᅇ 9:15*

<sup>14</sup> Pasa, ighaze uraat tiou ighur anoaᅇa popoia naol tivot ila lolomim, nene pale nditag Israela tighita ve lolodi ighama pani, ve tamtoghon todi pida pale titoor ᅇgar todi ila pa Maaron ve ighama mulin di. *Ro 10:19*

<sup>15</sup> Aghita. Sawa to yes Israela tizoor Maaron ᅇgar toni, ve ye ipul muri padi, nene inim ataama pa ival tiina to taana yesᅇa Maaron tilup di tinim ee moghon. Tovenen muri, ighaze Maaron ighama mulin yes Israela paama, ve yesᅇa tilup di muul tinim ee moghon, nene inimale mundigiin to yes mateeᅇa.‡

<sup>16</sup> Sawa to tigharaat mberet, ighaze tipamuun Maaron pa pida muuᅇ, nene pale mberet isob tonenen inim Maaron le. Ve ai oliv tovene paama. Ighaze waria inim Maaron le, nene pale boga

---

† **11:12:** Sawa to yes Yuda tizoornudug tighaze tirab Yesu izala ai pambaroon, yes tiyel pa ataama to Maaron. Eemoghon iit tawatag: Mateeᅇ toni to inim ataama pa Maaron ireu sosor toit ve ighama mulin ghiit. Ve sawa to Yuda tighur pataᅇani pa mbaᅇoonᅇa to Krisi, yes tipul Yerusalem ve tighau tila pa nudug pida. Mbeb tonenen to inim ataama pa yes to Yuda maau ne tiloon varu poia. ‡ **11:15:** Ataama ite to tatoor saveeᅇ waaro tonene, nene vene: “nene iit tawatag: Sawa to Maaron ipamundigin yes mateeᅇa, inim igharau wa.”

paam tisob tinim Maaron le. §

*Nam 15:17+*

*Mataad velegin yes Israela malep. Pasa iit paam, Maaron irau ighurghur ghiit maau*

<sup>17</sup> Yes Israela tinimale ai oliv to tipatari. Ve yam to Yuda maau ne, animale oliv susu bogadi. Aazne, nene inimale Maaron isoop oliv to tipatari boga pida tizi, ve ighur gham ala apaak ila inadi. Tauto aazne, atub toman oliv to patariin tonowen boga pida, ve yamña aghamgham taan ngoreeña ila waria. *Yer 11:16; Yo 15:2+; Ep 2:11+*

<sup>18</sup> Eemoghon apakur taumim sorok aghaze: “Yei popoiamai ve nilib pa oliv boga pida to Maaron isoop di tizi.” Venen malep. Matamim ingal. Yam ai boga moghon. Ai waria ighamgham tapiri ilat tiam maau. Yam aghamgham tapirimim ila ai waria.

<sup>19</sup> Ve yam pida pale amundig ve asaav aghaze: “Oliv boga tonowen, Maaron isoop di tizi, leso yei nila nigham inadi.” <sup>20</sup> Saveeñ tiam tonanan onoon. Eemoghon Maaron isoop di sorok maau. Ye isoop di tizi pasa, yes tighur ila toni maau. Ve aazne, yam agham inadi pasa, ayoon ariana ve akis ghurla tiam. Eemoghon apakur taumim malep. Yam amatughez. *Is 66:2,5; 1Kor 10:12; Pil 2:12; 1Pe 1:17*

---

§ **11:16:** Mberet pida to tipamuñ Maaron pani, nene iza to yes Israela eñaeña to tighur ila to Yesu muuñ. Ve ai oliv waria, nene iza to yes Israela nditimbudi Abaram, Isak, ve Yakop to Maaron imbua saveeñ toman di. Mbeb ru tonowen tigham Maaron lolo ineep tunja ila to yes Israela. Tauto ye irau ipul muri padi kat maau.

<sup>21</sup> Pasa, ighaze Maaron ighurghur oliv tau boga maau, nene pale yam paam, ye irau ighurghur gham maau.

<sup>22</sup> Tovenen matamim ingal pooi. Onoon, Maaron ye poia pughu. Eemoghon ye irau ighurghur ghiit maau. Yes Israela to tipul muridi pani ve titap, ye ighurghur di maau. Ve yam, ghoru igham poian gham. Eemoghon yam irau akis poia toni ariana, ve aneep iloon ila. Ighaze maau, ye pale isoop gham azi paam. *1Kor 15:2; Hib 3:14*

<sup>23</sup> Ve muri, ighaze yes Israela titoor ngar todi ve tighur ila to Krisi, nene pale Maaron ipaak di tila inadi muul. Pasa, ye tapiri irau igham tovene. <sup>24</sup> Aghita. Yam to Yuda maau ne, animale oliv susu. Yam avot ila oliv to patariin ne maau. Eemoghon Maaron igham uraat payam, tauto aazne apaak ila oliv to patariin tonowen ve anim boga. Ighaze Maaron igham tovene payam, onoon kat, oliv to patariin bogadi to ye isoop di tizi, ye pale ipaak di tila inadi muul.

*Muri, yes Israela pale tighur ila to Krisi*

<sup>25</sup> Yam tonvetaz, you naghaze navotia mbeb yongaan eez payam. Leso apakur gham sorok sob. Onoon, aazne Maaron ipul yes Israela pida titaghon taudi ngar todi. Tauto ngar todi iyaryaan kat tighaze tizoor saveen toni. Eemoghon ye irau ipul di tineep tovene itaghoni taghoni gha ila ne maau. Pale tinepneep tovene, le ye iyou ndug ndug tamtoghonadi to ye isia di pataghaan ne tisob tinim le. *Lu 21:24; Yo 10:16; Syg 7:9*

<sup>26</sup> Ghoru igham mulin yes Israela tisob paam. Saveenja timbooda pataghaan wa:

“Volaan̄a pale ineeṗ lolooz Zion ve inim.

Ve ye pale igham Yakop papaghu toni tipul  
 ngar todi samsamia, ve matadi ingal Maaron  
 muul. *Mbo 14:7; Is 59:20*

<sup>27</sup> Ve you pale naghur ledi ataam paghu, lesu  
 nareu sosor todi ve yeiṅa nilup ghei muul  
 ninim ee moghon.” *Is 27:9; Yer 31:33+; Hib  
 8:8+*

<sup>28</sup> Aazne, yes Israela to tighur ila varu poia  
 maau, tinim Maaron koia. Ve nene inim ataam pa  
 poia to Maaron iza to ndug ndug to Yuda maau ne.  
 Eemoghon ye lolo inepneep to yes Israela sone.  
 Pasa, ye tau isia di tinim le wa. Ve nditimbudi  
 Abaram, Isak, ve Yakop, to ndamodi padi. *Lo 7:8,  
 10:15; Ro 9:5*

<sup>29</sup> Ighaze Maaron ipoi tamtoghon eta inim le, ve  
 igham mbeb poia eta pani, ye irau itoor ngar toni  
 muul ne maau. Tovenen ye irau ipul muri pa  
 tamtoghon tonenen kat, ma igham mulin mbeb  
 tonenen ne maau. *Nam 23:19*

<sup>30</sup> Aghita. Muun̄, yam to Yuda maau ne, azor-  
 zoor Maaron ngar toni. Ve aazne, yes Yuda anadi  
 tighamgham tovene. Eemoghon ngar to tighami,  
 tauto inim ataam payam ve Maaron lolo isamin  
 gham, ve ireu sosor tiam.

<sup>31</sup> Tovenen aazne, yes Israela tizoroor Maaron  
 ngar toni. Eemoghon muri, poia toni to ye lolo  
 isamin yam to Yuda maau, ve ireu sosor tiam,  
 nene pale ipamundigin ngar todi. Lesu titoor ngar  
 todi, ve Maaron lolo isamin di ve ireu sosor todi  
 paam. <sup>32</sup> Pasa, Maaron ipul ngar to zoraan̄ saveen̄  
 ighamun iit tasob. Lesu iit tasob leed ataam ee  
 moghon pa tala toni. Nene poia toni to ye lolo

isamin ghiit ve ireu sosor toit. Ataam ite paam maau. *Ro 3:9; Ga 3:22*

*Tapait Maaron pa ngar toni*

<sup>33</sup> Onoon kat, Maaron, ye ngar pughu. Ngar toni, nene ila le ila kat, inimale mazovan bibiliija. Pasa, ye iwatag mbeb tisob. Sei irau iwatag katin ngar toni ve ataam to ye itaghoni? Ighaze tatoova pa tagham ngar pani, nene pale ngar toit iraua maau. *Yop 11:7+; Mbo 92:5*

<sup>34</sup> “Pasa, sei iwatag Ngeu Tiina ngar toni?

Ve sei irau iuuli pa ngar? *Is 40:13; 1Kor 2:16*

<sup>35</sup> Ve sei igham Maaron le mbeb, lesu muri iyati? Maau.” *Yop 35:7, 41:11*

<sup>36</sup> Pasa, ye tau to inim pughu pa mbeb tisob. Ve mbeb tisob tiyaryaaj ila toni, ve tineep lesu tipaghazonan ye iza. Tovenen iit tapaiti irau sawa isob. Onoon. *1Kor 8:6; Kol 1:16; Hib 2:10; Syg 4:11*

## 12

*Tapul tauud tanim Maaron le*

<sup>1</sup> Tovenen yam tonvetaz, aghita. Maaron lolo isamin ghiit ve igham mulin ghiit wa. Tauto naghaze napariaan gham pa aghur anonamim ila pa Maaron inim watoonrau mata yaryaara. Watoonrau tovene, nene patabuan ila ye mata, ve ighami lolo poia kat. Ighaze tambees pa Maaron itaghon ataam tovene, nene denja. *Yo 4:24; Ro 6:13; 1Pe 2:5*

<sup>2</sup> Yes to titaghon ngar to taan, yam ala toman di pa ngar todi muul malep. Apul Maaron itoor ngar tiam ve gabuamim inim paghu kat. Lesu aghilaal ngar to Maaron lolo pani. Nene ngar to poia kat, ve

denja moghon, ve ighami lolo poia. *Ep 4:23, 5:17; 1Yo 2:15+*

*Tangabiiz poian tauud, ve iit enjaeja tagham uraat to Maaron ighuri inim nimaad*

<sup>3</sup>Maaron ighur ghou nanim uraata toni itaghon tau lolo ve poia toni. Tovenen you naghaze n-  
pariaan gham asob tovene: Agham ngar sorok  
aghaze yam popoiamim alib pa nditamim malep.  
Yam irau angabiiz poian taumim: Maaron igham  
gham aghur ila ariana ve ataghon katin ghurla  
tiam ngara, ma maau? *2Kor 13:5; Pil 2:3*

<sup>4</sup>Iit anonaad le babaña naol: Agheed, nimaad,  
avood, mataad, ve mbep pida paam. Ve anonaad  
to naol ne, ledi uraat enjaeja irau di. <sup>5</sup>Iit to taneep  
tunja ila to Krisi, tovene paam. Iit tanimale Krisi  
nima, aghe, ve anona babaña pida paam to tilup  
di tinim ee moghon. *1Kor 12:12-27*

<sup>6</sup>Maaron irei uraat ve tapiri naol naol le irau ghiit,  
itaghon tau lolo ve poia toni. Tovenen iit irau  
tagham uraat toit toit. Ighaze Maaron ighur ngeu  
eta inim propet, ngeu tonenen irau ivotia Maaron  
aliña pa tamtoghon itaghon ghurla toni.\* *1Kor  
12:4+; Ep 4:7,11+; 1Pe 4:10+*

<sup>7</sup>Ighaze Maaron igham ngeu eta le ngar pa uraat  
to ulaan tamtoghon, ye irau itaghon katin ngar to  
ulaan. Ve ighaze tamtoghon eta le uraat pa ipatoot  
tamtoghon pa Maaron aliña, ye irau ipatoot di  
kat. <sup>8</sup>Ve ighaze eta le ngar pa uraat to palotiin  
tamtoghon, ye irau ipalot di. Ve ighaze eta le uraat

---

\* **12:6:** Ataam ite to tator saveej waaro tonene, nene vene:  
“ngeu tonenen irau ivotia Maaron aliña pa tamtoghon itaghon  
saveej to iit taghur ila.”

pa reinj mbeb pa yes mbolaanja, ye irau iuul di kat, ve irei mbeb toni toman lolo poia. Ighaze eta le ngar pa nginiinj uraat, ye irau mata iza pa uraat toni, ve igham katini. Ve ighaze eta le ngar pa uraat to ulaanj yes to patajani igham di, ye irau iuul di toman lolo poia. *2Kor 9:6-13; 1Pe 5:2*

*Tutuunj pida to tinjarua tamtoghon to Krisi*

<sup>9</sup> Ighaze yam aghur lolomim pa tamtoghon, agham kaarom pani malep. Aghur lolomim padi kat, ve apatoonj anonja ivot. Yam irau aghur koi pa ngar samia ve aneep saganuun pani. Ve ngar poia, ghoru akisi tunja. *2Kor 6:6; 1Tes 5:21+; 1Pe 1:22*

<sup>10</sup> Yam anim tonvetaz to Krisi wa. Tovenen lolomim pa taumim kat ve agham poian gham. Agham ngar pa taumim izamim malep. Apait nditamim pa ngar popoia to yes tigham di. *Ga 5:26; Pil 2:3; Hib 13:1*

<sup>11</sup> Uraat to agham pa Ngeu Tiina, matamim mor-moria pani malep. Apul Avuvu Patabuanj ipa-mundigin gham, lesu matamim kavianaanja pa mbe-soonj tiam, ve aghami toman lolomim. *1Tes 5:19*

<sup>12</sup> Yam awatag: Muri, Maaron pale igham mulin ghiit ve taneep pooi. Matamim ingal mbeb tonene ve aghur matamim pani irau sawa isob. Lesu igham gham lolomim poia. Ve ayoon ariana pa badoonj patajani, ve asunj irau sawa isob. Apul sunjuunj malep. *Ro 5:2, 15:13; Kol 4:2; 1Tes 5:16+; Yems 1:4*

<sup>13</sup> Ighaze mbolaanj igham Maaron tamtoghon toni, ghoru auul di. Ve ighaze loomba tilat, yam agham di toman lolomim poia, ve anjin poian di. *2Kor 8:7; Hib 13:2; 1Pe 4:9*



14 Ighaze tamtoghon tighur pataņani payam pasa, ataghon űgar to Krisi, yam aghur samia iza todi malep. Aghason Maaron pa igham poian di. *Mt 5:44+; 1Kor 4:12; 1Pe 3:9*

15 Yes to tinidi iza, yam tinimim iza toman di. Ve yes to ledi pataņani ve titaņ, yam ataņ toman di. 16 Yam asob alup lolomim ve űgar tiam inim ee moghon. Apait taumim, ve ala toman yes to izadi tintina moghon malep. Yam irau alup gham toman yes to ledi izadi maau. Ve aparim taumim pa űgar tiam malep.† *Mbo 131:1+; Ro 15:5+; 2Kor 13:11; Pil 2.2*

17 Ighaze tamtoghon tigham samin gham, ayati pa űgar samia malep. Atoova pa ataghon űgar to denia moghon ila tamtoghon tisob matadi. *Mt 5:39; 2Kor 8:21; 1Tes 5:15*

18 Ve atoova pa alup gham toman tamtoghon tisob anim ee moghon. Tovenen sa űgar to yam irau aghami pa ilup gham, ghoru aghami. *Mt 5:9; Ro 14:19; Hib 12:14*

19 Yam ndiran tiou, lolog payam kat. Nayol aliņag muul. Ngar samia to tamtoghon tigham payam, yam ayati malep. Apuli ila Maaron nima. Ye tau pale ighur pataņani iņarua di. Pasa, Maaron aliņa to timbooda, isaav ighaze:

“You leg uraat pa naghur atia pa űgar samia. Taug pale nayati.” *Lo 32:35; Mbo 94:1; Hib 10:30*

---

† **12:16:** Ataam ite to tatoon saveeņ waaro tonene, nene vene: “Azuarua gham pa uraat tintina pa agham izamim pani malep. Uraat tau tamtoghon tighita inimale uraat sorok, yam irau aghami toman lolomim poia.”

<sup>20</sup> Tovenen taumim ayat n̄gar samia malep. Agham poian koiamim̄ja. Pasa, Maaron alīja waaro ite isaav tovene:

“Ighaze koiam eta pitoola, ugham a aniin̄.

Ve ighaze muruni, ugham a ya.

Leso ughami ighilaala sosor toni, ve maya.”

*Igham 23:4+; Np 25:21+; Mt 5:44*

<sup>21</sup> Tovenen apul n̄gar samia itatan gham malep. Yam irau atatan n̄gar samia pa n̄gar poia.

## 13

### *Taneep ila yes pooza to taan sambadi*

<sup>1</sup> Tamtoghon tisob irau tineep ila yes pooza to taan to tin̄gin ghiit ne sambadi. Pasa, pooza eta to taan iyoon sorok maau. Maaron tau ighur uraat tonowen ila nimadi. *Yo 19:11; Tit 3:1; 1Pe 2:13+*

<sup>2</sup> Tovenen ighaze tamtoghon eta izoor yes pooza to taan, nene ye izoor Maaron. Pasa, Maaron to ighur di pa uraat todi. Tovenen ighaze tamtoghon eta izoor di, ye pale igham atia pa n̄gar toni tone-nen. <sup>3</sup> Laak, sei masin to timatughez pa yes pooza to taan? Tamtoghon to tighamgham n̄gar poia? Maau. Ndiran to tighamgham n̄gar samsamia, to timatughez padi. Tovenen ighaze yom lolom pa yes pooza to taan tighur patan̄ani payom maau, ghoru ugham n̄gar poia moghon. Leso umatughez sob, ve yes pooza tipait ghom. <sup>4</sup> Pasa, pooza to taan, yes mbesoon̄ja to Maaron. Yes tineep pa tiuul ghom, lesu uneep pooi. Eemoghon ighaze ughamgham n̄gar samia, ghoru upatum ghom. Pasa, yes tikis buza sorok maau. Yes izadi pa ghuruun̄ atia pa tamtoghon to tighamgham n̄gar samia. Leso tipatoon̄ mbalmbali to Maaron padi.

Ve yes irau tighurghur ghom maau. <sup>5</sup> Tovenen iit tasob irau taneep ila yes pooza sambadi, ve taloon alinadi. Pasa ighaze tazoor di, nene pale Maaron ate yabyab pait, ve yes tigham ye nagho ve tighur atia pait. Ve mbeb ite. Ighaze tazoor di, nene pale tauud tayamaana ila lolood taghaze iit tagham sosor ila Maaron mata.

<sup>6</sup> Pughu tonene to yam irau apiyaav takes paam. Pasa, yes pooza, nene yes mbesoonja to Maaron. Sawa isob, yes tipamaat pa uraat to Maaron ighuri ila nimadi. <sup>7</sup> Tovenen sa mbeb to yam irau agham pa yes pooza, ghoroghami. Ighaze tipoi gham pa takes, ghorogham padi. Ve yes to ledi izadi, yam atandag padi ve apakur di. Pasa, ighaze agham padi tovene, nene denja. *Mt 22:21*

*Taghur lolood pa tamtoghon tisob ve tagham poian di*

<sup>8</sup> Ighaze agham bun, apuli ineep mala sob. Rikia ve ayati. Eemoghon iit tasob leed bun tiina eez inepneep. Tayati, pale taraua maau. Bun toit, nene vene: Iit irau lolood pa tamtoghon tisob ve tagham poian di. Pasa, ngeu to ighaze lolo pa tamtoghon ve igham poian di, nene ye ipatoon tutuun anonja ivot. *Mt 22:37-40; Ga 5:14*

<sup>9</sup> Pasa, tutuun to naol ne inimale “Ughur maat malep,” “Urab tamtoghon imaat malep,” “Uyub malep,” “Lolom igham pa nditam mbeb todi malep,” ve tutuun pida paam, nene tisob tineep ila tutuun ee moghon tonene lolo: “Lolom pa tamtoghon ve ugham poian di, inimale lolom pa taum.” *Igham 20:13+; Wkp 19:18*

<sup>10</sup> Ighaze lolood pa tamtoghon, nene iit irau tagham sosor eta padi maau. Tauto ighaze lolood pa tamtoghon ve tagham poian di, nene pale tataghon tutuunj ngara ve tagham tutuunj anona ivot. *1Kor 13:4+; Ga 5:6; Yems 2:8*

### *Sawa inim igharau wa*

<sup>11</sup> Tovenen yam irau ataghon ngar tovene. Pasa, yam aghilaal sawa tonene wa. Tovenen agheen iraua. Amundig! Pasa, sawa to Maaron igham mulin ghiit, nene inim igharau wa. Sawa to iit taghur ila muunj, sawa tonenen inepneep mala sone. Eemoghon aazne, inim igharau wa. Tovenen agheen iraua. Amundig! *1Kor 7:29+; Ep 5:14; 1Tes 5:6+*

<sup>12</sup> Aghita. Mbonj ighaze isob, ve ndugizau tonene. Tovenen tapul ngar to ndoroom isob ineep, ve tandud ghiit pa ngar to ghazonja inimale ndaaba tigharaat di pa mburuguunj to malmal. *Ep 5:11, 6:11+*

<sup>13</sup> Iit irau tataghon ngar to ghazonja tanimale tamtoghon to tilaagh pa ndag. Ve ngar to talup ghiit pa ghunuunj ve ghamuunj ngar samsamia naol, ngar to ghuruunj maat, ngar to mataad samia tanimale ngavuun, ngar to parzoraan, ve ngar to nujuaanj toman ngar samsamia pida paam, nene tagham di muul malep. *Lu 21:34; Ga 5:19+; Ep 5:18; 1Pe 4:3; 1Yo 1:7*

<sup>14</sup> Agham ngar to Tiina toit Yesu Krisi inim lemim, inimale andud gham pa nonogiiija paghu. Ve ngar samsamia to lolomim mungina ipapazaagh gham pani, nene akaal ataam pa ghamuunji malep. *Ga 3:27; Ep 4:24; Kol 3:10; 1Pe 2:11*

# 14

*Ighaze nditaad pida titaghon ataam ite pa ghurla todi, nene tayou avood padi malep*

<sup>1</sup> Ighaze tamtoghon eta ghurla toni iyaryaan sone, ve ye ighaze ilat toman gham pa sunuun, ghoru ayok pani, ve aghami toman lolomim poia. Ayou avomim pani pa ngar toni pida to ite ris pa ngar tiam ne malep. *Ro 15:1; 1Kor 8:9+, 9:22*

<sup>2</sup> Tamtoghon pida tighur ila tighaze yes irau tighan mbeb tisob. Ve tamtoghon pida, ghurla todi iyaryaan kat maau, ve tigham ngar tovene: Ighaze tighan mbeb pida mindadi, nene pale igham di tingalaan ila Maaron mata maau. Tauto tighanghan aniiñ ve ndoor moghon.\*

<sup>3</sup> Yes to tighanghan mbeb tisob, matadi izi pa nditadi to timatughez pa ghaniin mbeb pida malep. Ve yes to timatughez pa ghaniin mbeb pida, tovene paam. Tighita nditadi to tighanghan mbeb tisob, ve tighaze yes tissor malep. Pasa, yes paam, Maaron igham di tinim le. *Kol 2:16*

<sup>4</sup> Ve yom sei to ughaze ungbaiiz yes mbesoonja to Ngeu Tiina pa ngar to tighamghami? Maaron tau pale ingabiiz di. Ighaze ighita di ighaze ngar todi denja, ma tissor, nene ye mbeb toni. Eemoghon ye pale ighita di ighaze ngar todi denja. Pasa, ye

---

\* **14:2:** Sawa pida, yes to Yuda maau ne, tirab sipsip ma makau inim watoonrau pa maaron kaaromja todi, ve timoz suruvu iloon ila rumai lolo, ve tigham suruvu ila ndug to raukoliin, leso tamtoghon tigholi. Ve ataam todi to rabuun mbeb, nene ite pa ataam to yes Yuda. Yes to timatughez pa ghaniin mbeb mindadi, timatughez pa ghaniin mbeb tovene.

irau ipalot di, lesu tiyoon ariana ve titaghon ngar toni. *Mt 7:1; Yems 4:11+*

<sup>5</sup> Ve tamtoghon pida, yes tighita tighaze sawa eez to sunjuun, nene patabuan ilib pa sawa pida. Ve tamtoghon pida tighita tighaze sawa to naol, nene raratedi moghon ila Maaron mata. Nene poia. Tamtoghon enaena irau tigham ngar pooi pa mbef tonene, ve sa ngar to tighita tighaze denja, ghoru titaghoni. <sup>6</sup> Tamtoghon to tipatab pa sawa eta, tighamgham tovene pa tipait Ngeu Tiina. Ve tamtoghon to tighanghan mbef tisob, yes paam tipakur Ngeu Tiina. Pasa, sawa to tighan, lolodi poia pani ve tipaiti pa mbef to ye igham padi. Ve yes to tighanghan mbef pida maau ne, yes paam matadi ingal Maaron. Tauto tighamgham tovene, ve tipapaiti pa poia toni toman lolodi poia. *1Kor 10:30+; 1Tim 4:3+*

<sup>7</sup> Pasa, nepoonaad, nene mbef to iit tauud maau. Ve mateen toit paam, nene mbef to iit tauud maau. *2Kor 5:15; Ga 2:20; 1Pe 4:2*

<sup>8</sup> Ighaze taneep, nene taneep pa tambees pa Tiina toit ve tapait iza. Ve ighaze tamaat, nene taneep ila ye nima. Tovenen ighaze taneep, ma tamaat, nene iit toni moghon. *Pil 1:20; 1Tes 5:10*

<sup>9</sup> Pasa, Kriisi imaat ve imundig muul, lesu inim tiina pa tamtoghon tisob. Yes mateena, ve yes to tineep matadi iyaryaar ne paam. *Mt 28:18+; Mbanj 2:36*

<sup>10</sup> Tovenen pughu vena to yom ughaze unghabiiz tonvetaz tiom to Kriisi ve matam izi padi? Yom uwatag maau? Muri, iit tasob pale tayoon ila Maaron mata. Lesu ingabiiz ghiit, ve ighur atia pait. *Mt 25:31+; Mbanj 17:31; 2Kor 5:10*

11 Saveeṅa timbooda pataghaan wa tovene:

“You Tiina tiam. Naneep irau sawa isob. Avog iyaryaan naghaze: Tamtoghon tisob pale tiput aghedi payou ve tipait ghou, ve tisaav ghazonṅa tighaze you Maaron tau.” *Is 45:23; Pīl 2:10+*

12 Tovenen iit eṅaṅa tasob pale tayoon ila Maaron mata, ve tavotia ṅgar to taghami izi taan ne ila toni. *Mt 12:36; 2Kor 5:10; 1Pe 4:5*

*Tagham nditaad titap pa ghurla todi malep*

13 Tovenen iit taṅgabiiz nditaad ve taveleg di muul malep. Ve tagham ṅgar eta pa tagham yes toṅvetaz to Krisi titap pa ghurla todi, ma tapoon ataam padi pa Krisi malep. *Mt 18:6+; 1Kor 8:9, 10:32*

14 Pasa, Tiina toit Yesu ipaghazonṅan ṅgar tiou le nawatag kat tovene: Mbeb to taghanghan di ne, eta samia ila Maaron mata maau. Eemoghon ighaze tamtoghon eta igham ṅgar ighaze mbeb eta iṅgalaan ila Maaron mata maau, ye ipatumi. Pasa, ighaze ighan mbeb tonenen, nene ye igham sosor. *Mk 7:14+; Mbaṅ 10:15; Tit 1:15*

15 Tovenen ighaze yom ughan mbeb eta ila toṅvetaz tiom mata, le ureu lolo, nene yom utaghon ṅgar to lolood pa tamtoghon maau. Mbeb tovene, ughani malep. Pale uwaghamun toṅvetaz tiom to Krisi imaat pani. *1Kor 8:11+, 10:24+*

16 Tovenen ighaze yam agham ṅgar aghaze mbeb tisob, nene popoia pa ghaniin, nene poia. Eemoghon apatum gham. Pa vene, aghan mbeb to nditamim pida tirere pani, ghoru tiyou avodi payam tighaze yam agham ṅgar samia. <sup>17</sup> Pooz to Maaron, nene mbeb to ghaniin ve ghunuun maau.

Pooz to Maaron ngara, nene vene: Tataghon ngar denja, ve itinja talup ghiit tanim ee moghon, ve Avuvu Patabuan igham ghiit taneep toman lolood poia kat ve lolood luuma. *Ro 15:13; Ga 5:22+*

<sup>18</sup> Tamtoghon to ighaze imbees pa Krisi itaghon ataam tovene, nene pale Maaron lolo poia pani, ve tamtoghon paam tiyok pani tighaze ngar toni poia. *2Kor 8:21*

<sup>19</sup> Iit irau tazuaría ghiit pa ghamuun ngar to igham tamtoghon tisob tineep pooi toman lolodi luuma, ve tawapalotin ghiit pa ngar popoia pida. *Mbo 34:14; Ro 15:2; Hib 12:14*

<sup>20</sup> Tovenen yam awazoran gham pa mbef to ghaniin malep. Pa vene, awaghamun uraat to Maaron. Onoon, mbef tisob tingalaan ila Maaron mata, ve popoia pa taghan di. Eemoghon ighaze tamtoghon eta ighan mbef eta, ve igham ita ite itap pa ghurla toni, nene ye igham ngar samia. *Ro 14:14+; 1Kor 8:9,13*

<sup>21</sup> Tovenen ighaze matam ingal ughaze ughan mbef minda, ma ughun vaen, ma ugham ngar ite paam to irau igham tonvetaz tiom eta itap pa ghurla toni, nene poia pa upul ngar tonanan.

<sup>22</sup> Mbef tovene, ighaze yom ughur ila ughaze poia, ma samia, nene mbef to yamru Maaron. Ighaze tamtoghon eta iyamaan tau ighaze ngar to itaghoñi, nene Maaron le saveen pani maau, ye pale tini iza. *1Yo 3:21*

<sup>23</sup> Eemoghon ighaze tamtoghon eta lolo ru pa mbef eta ve ighani, nene ye igham sosor. Pasa, ye ighur ila ve igham ngar tonenen maau. Ve sa ngar to iit taghami itaghoñ ghurla toit maau, nene isosor.



# 15

*Tagham ngar pa tauud moghon malep. Tagham ngar pa nditaad paam*

<sup>1</sup> Iit to ghurla toit iyaryaan ne, irau tataghon tauud lolood maau. Iit irau mataad ingal yes to ghurla todi iyaryaan sone, ve tatatan tauud, ve tataghon ngar to irau lolodi ve ngar todi, ve tatoova pa tapalot di. *Ro 14:1; 1Tes 5:14*

<sup>2</sup> Tovenen iit tasob irau tataghon ngar to iuul nditaad, ve tapalot di pa ngar popoia. Leso tapariaan ghurla todi. *1Kor 10:24; Pil 2:4+*

<sup>3</sup> Agham ngar pa Krisi. Ye igham ngar pa tau maau. Ngar toni itaghon Maaron aliņa waaro eez to timbooda. Isaav tovene:

“O Maaron, saveen velegiin to tipiyaava payom, nene inim payou paam.” *Mbo 69:9; Yo 6:38*

<sup>4</sup> Maaron aliņa isob to muun timbooda, nene ineep pa ipaghazonan ghiit, ve ipalot ghiit. Leso lolood ru malep, ve tayoon ariņa pa badoon patanani, ve taghur mataad pa sawa to Maaron igham mulin ghiit ve taneep pooi. *Ro 4:23+; 1Kor 10:11; 2Tim 3:16+*

<sup>5</sup> Maaron toit ipapalot ghiit, lesu tayoon ariņa pa badoon patanani. Ye tau pale igham gham alup lolomim toman ngar tiam inim ee moghon itaghon ngar to Yesu Krisi. *Ro 12:16; 1Kor 1:10; Pil 2:2*

<sup>6</sup> Leso yam asob lolomim ee moghon, ve alup avomim, ve apait Tiina toit Yesu Krisi Tama Maaron pa tapiri ve poia toni. Onoon.

*Krisi inim pa yes Yuda moghon maau. Ye inim pa tamtoghon tisob*

<sup>7</sup> Kriſi lolo poia payam, ve igham gham anim le wa. Tovenen yam paam, lolomim poia pa taurim ve agham poian gham. Leso apaghazonan Maaron iza tiina toman tapiri ve poia toni. <sup>8</sup> Pasa, you nasaav payam: Kriſi inim mbesoonja pa yes Yuda, ve igham uraat itaghon saveen mbuaan to Maaron isavia pa nditimbudi. Leso anonja ivot, ve ipaghazonan Maaron ighaze saveen toni, nene onoon moghon. *Mban 3:25+; 2Kor 1:20*

<sup>9</sup> Ve igham ndug ndug to Yuda maau ne tipait Maaron iza pa tapiri ve poia toni. Pasa, ye lolo isamin di ve ireu sosor todi. Saveenja timbooda pataghaan wa. Isaav tovene:

“You pale napait ghom ila ndug ndug to Yuda maau ne lolodi, ve nambou mboun pa napakur izam.” *Mbo 18:49; Yo 10:16*

<sup>10</sup> Ve saveen waaro ite isaav tovene:

“Yam ndug ndug to Yuda maau ne, asob alup gham toman Maaron tamtoghon toni, ve tinimim iza pani.” *Lo 32:43*

<sup>11</sup> Ve saveen waaro ite isaav tovene:

“Yam to Yuda maau ne, asob apakur Maaron. Yam ndug ndug to aneep irau taan, asob apait Maaron iza.” *Mbo 117:1*

<sup>12</sup> Propet Isaia paam isavia mbeb tonene ighaze: “Paghu eez to Yesi pale ivot ve inim kinik, ve igham pooz pa ndug tisob.

Ndug ndug to Yuda maau ne, pale tinumeera, ve tighur matadi pa sawa to ye iuul di tineep pooi.” *Is 11:1,10; Mt 12:21; Syg 22:16*

<sup>13</sup> Maaron to iit taghurghur mataad pani, pale igham yam to aghur ila toni lolomim poia kat,

ve aneep poia toman lolomim luuma. Ve Avuvu Patabuan tapiri ipalot gham, lesu lolomim ru sob, ve anumeer Maaron kat, ve asajan sawa to ye igham mulin ghiit ve taneep pooi. Onoon. *Ro 14:17; 1Kor 4:20*

*Paulus isavia uraat toni to votiaan varu poia*

<sup>14</sup> Yam tonvetaz, you nawatag: Ngar poia ivon ila lolomim, ve aghazon kat pa Maaron alina. Tovenen yam asob irau apatoot nditamim pa saveen toni.

*2Pe 1:12; 1Yo 2:21*

<sup>15-16</sup> You nawatag: Ngar pida to nambood di ila rau tonene, nene arianadi. Eemoghon nasavia di tighazon payam, lesu napamundigin ngar tiam muul, ve matamim kisin di. Pasa, you nanimale ngeu to watoonrau to naghama uraat payam. Maaron ighur ghou nanim mbesoona to Yesu Krisi itaghon tau lolo ve poia toni, ve ighur uraat inim nimag pa navotia varu poia toni pa ndug ndug to Yuda maau ne. Lesu titoor ngar todi ve tighur ila to Krisi, ve Avuvu Patabuan igham uraat padi le titaghon ngar patabuan. Ghoru naghur di tila to Maaron tinim watoonrau to ighami lolo poia kat. *Mban 9:15; Ro 11:13; Ga 2:7+*

<sup>17</sup> Yesu Krisi, ineep toman ghou pa uraat to naghama ighami pa Maaron. Tauto tinig iza pa uraat tiou tonene. <sup>18</sup> You irau avog ila pa saveen ma uraat ite paam ne maau. Uraat to Krisi ighami ivot ila nimag, mbeb tonene moghon to pale nasavia. Ye tau ipapalot saveen toman uraat tiou. Tauto uraat tiou ighur anona, ve ndug ndug to Yuda maau ne titoor ngar todi, ve titaghon ngar to Krisi. <sup>19</sup> Avuvu Patabuan tapiri ineep tiou,

ve sawa to navotia mos, ye ighamgham mbeb gharatoonjadi ve uraat tintina tivotvot tinim ghilaloon pa tamtoghon, leso tighur ila to Krisi. You napamundigin uraat izi Yerusalem muun. Ghoron nataghon taan nala nala le navot izi taan suruvu to Ilirikum. Ndug tonowen tisob tiloon katin varu poia to Yesu Krisi wa. *Mban 19:11; 1Kor 2:4; 2Kor 12:12*

<sup>20</sup> Pasa, ngar tiou iyaryaan naghaze ndug sine to tiloon Krisi varu sone, ghoron nala navotia varu poia padi. You lolog pa narei ruum izala gungun to tamtoghon ite ipayoonda ne maau. Naghaze taug napayoon gungun, ve narei ruum izala, ghoron poia. <sup>21</sup> Ataam to nataghoni pa uraat tiou, saveenja ineep ila Maaron aliña to timbooda. Isaav tovene: “Tamtoghon to tiloon varu sone, nene pale tighita.

Ve yes to tiloon saveen toni sone, nene pale tiloonja ve tiwatagi.” *Is 52:15*

### *Paulus ighaze ila ighita yes Roma*

<sup>22</sup> Sawa naol, you naghaze nalat naghita gham. Eemoghon uraat tiou to votiaan varu poia ikiskis ghou, tauto nalat maau. *Ro 1:13*

<sup>23-24</sup> Eemoghon aazne, naghita naghaze yes to taan suruvu tonene, you leg uraat eta padi muul maau. Ve naghama ngar naghaze nala pa taan suruvu to Spen ve navotia varu poia izi tonowe. Tovenen you pale nalat nangig gham, ve naneep toman gham ris le isob, ghoron auul ghou pa laghoon tiou, ve namundig muul nala pa Spen. Pasa, ndaman katindi, matag ingal naghaze nalat naghita gham, ghoron poia. *1Kor 16:6*

<sup>25</sup> Eemoghon you pale nala Yerusalem muun, ve nauul Maaron tamtoghon toni to tineep tonowe le isob, ghoronalat navot tiam. *Mbanj 19:21, 24:17*

<sup>26</sup> Pasa, yes to Masedonia ve Akaia lolodi ipamundigin di, ve tingoog yaam pida inim nimadi, ve tighuri inim nimag wa. Tighaze naghami nala, ve naghama pa Maaron tamtoghon toni to tineep toman mbolaan izi Yerusalem. *1Kor 16:1+; 2Kor 8:1, 9:2,12; Ga 2:9*

<sup>27</sup> Ngar tonene, taudi lolodi ve tighami. Ve nene denja. Pasa, yes Yuda tinim ataam pa yes to Yuda maau ne, ve tigham mbeb popoia katindi to iuul di pa nepoon to anunudi. Tovenen ighaze yes to Yuda maau ne, matadi ingal yes Yuda pa mbeb popoia pida to taan ve tiuul di pani, nene poia.

<sup>28</sup> Tovenen you naghaze napasob uraat tonene, ve naghur yaam to tingooga ne ila yes Yerusalem nimadi le isob, ghoronalat naghita gham, ve nala pa Spen. *2Kor 8:20+*

<sup>29</sup> You nawatag: Sawa to natal peria tiam, nene pale poia tiina kat to Kresi iza tiam. *Ro 1:11*

<sup>30-31</sup> Yam tonvetaz, itinja taghur ila to Tiina toit Yesu Kresi, ve Avuvu Patabuan igham ghiit lolood pa tauud. Tovenen you naghason gham naghaze asun Maaron ariana, lesa inim sigeu payou pa yes to Yudea to tighur ila maau. Ve iuul ghou pa uraat to naghaze naghami izi Yerusalem pa nauul tamtoghon toni. Lesa ilaan pooi, ve igham di lolodi poia. Tovenen aghur ghou ila sunjun tiam. Lesa itinja tazuarua ghiit pa ghamun uraat to Yesu Kresi. *2Kor 1:11; Kol 4:3*

<sup>32</sup> Ve muri, ighaze Maaron lolo pa ighaze natal, nene pale natal naghita gham toman lolod poia, ve

naneep toman gham ris ve itinja tawapalotin ghiit, ghoru nala.

<sup>33</sup> Maaron, ye igham ghiit taneep poia toman lolood luuma. Ye tau pale ineep toman gham asob. Onoon.

## 16

### *Paulus igham ndag poia toni ila pa yes Roma*

<sup>1-2</sup> You naghaze napaes payam pa livuud Fibi. Ye liva poia eez to iuluul lupuun to Krisi izi ndug Kenkria. Iuluul ival tiina, ve iuluul ghou paam. Tovenen sawa to ye ilat ivot, yam aghami toman lolomim poia, ve yamja aneep. Ve ighaze ye le patajani eta, ghoru auuli. Pasa, iit tamtoghon to Maaron irau tataghon ngar tovene.

<sup>3</sup> Agham ndag poia tiou ila pa Prisila yesuru azuwa Akwila to yeinja niluplup ghei pa uraat to Yesu Krisi. *Mbanj 18:2+,26; 2Tim 4:19*

<sup>4</sup> Yesuru tirei taudi payou, ve rismoghon tone timaat. Tovenen lolog poia kat padi ve napait di. Ve you moghon maau. Lupuun tisob to yes to Yuda maau ne, lolodi poia padi ve tipait di paam.

<sup>5</sup> Ve lupuun to Krisi to tiluplup di iloon ila yesuru ruum todi ne paam, agham ndag poia tiou ila padi. Ve ndag poia tiou ila pa Epenetus paam. You lolog pani kat, ve ye ngeu to imuun pa tamtoghon tisob to Asia, ve ighur ila to Krisi muun. *1Kor 16:15*

<sup>6</sup> Agham ndag poia tiou ila pa Maria. You nawatag: Ye ighamgham uraat tiina ila lolomim pa iuul gham. <sup>7</sup> Ve ndag poia tiou ila pa Andronikus yesuru Yunias. Yesuru tonjvetaz tiou, ve muun yeinja nineep ila ruum to yabyabuun lolo. Tamtoghon tighita di tighaze yesuru mbanjoonja popoia

kat to Krisi ve tilib pa mbanjoona pida. Ve yesuru tinim Krisi le muun, ghoru you anag.

<sup>8</sup> Agham ndag poia tiou ila pa Ampliatus paam. Pasa, Tiina toit Yesu ilup ghei, tauto lolog pani kat. <sup>9</sup> Ve ndag poia tiou ila pa itaad Urbanus to itina taluplup ghiit pa uraat to Krisi, ve ila pa itag ite Stakis paam. Pasa, you lolog pani kat. <sup>10</sup> Agham ndag poia tiou ila pa Apeles. Ye ngeu poia eez to itaghon katin ngar to Krisi. Ngar ve uraat to ye ighami, nene ipatoona ighaze ye iraua. Ve ndag poia tiou ila pa nditaad to tineep toman Aristobulus ila ruum toni ne paam. <sup>11</sup> Agham ndag poia tiou ila pa tonvetaz tiou Erodion. Ve ndag poia tiou ila pa Narsisus toman tamtothon toni to tinim Tiina toit Yesu le ne paam.

<sup>12</sup> Agham ndag poia tiou ila pa Tripena yesuru Triposa. Pasa, ndiliva ru tonowen, yesuru tirab taudi kat pa uraat to Tiina toit. Ve ndag poia tiou ila pa Persis paam. Ye liva ite to igham uraat naol pa Tiina toit. Tauto lolog pani kat. <sup>13</sup> Agham ndag poia tiou ila pa Rupus yesuru tina paam. Rupus, Tiina toit Krisi isia inim le wa. Ve naghita tina inimale you tina paam. *Mk 15:21*

<sup>14</sup> Ve agham ndag poia tiou ila pa Asinkritus, Pelegon, Ermes, Patorobas, Ermas, ve tonvetaz pida to Krisi to yesna tinepneep ne paam. <sup>15</sup> Ve ndag poia tiou ila pa Pilologus, Yulia, Nereus yesuru livu, ve Olimpás, toman tamtothon tisob to Maaron to yesna tinepneep ne paam.

<sup>16</sup> Yam asob anim tonvetaz to Krisi wa. Tovenen

lolomim poia pa taumim, ve awakisin nimamim.\*

Lupuun to Krisi to tineep irau taan suruvu tonene, tisob tigham ndag poia todi payam paam.

### *Saveen palotiin pida*

<sup>17</sup> Yam tonvetaz, apatum gham pa yes to tizor-zoor saveen to tipatoot gham pani, ve tireureu lupuun tiam, ve tighamgham tamtoghon titap pa ghurla todi. Ndiran tovene, aneep sagan padi. *2Tes 3:14; Tit 3:10; 2Yo 10*

<sup>18</sup> Pasa, yes timbees pa Tiina toit Krisi maau. Titaghon ngar to ulidi moghon. Saveen todi, nene ngoreenja kat. Tauto igham yes to ledi ghilaloon maau ne lolodi, ve titaptap pa ghurla todi. *Pil 3:18+; Kol 2:4; 2Pe 2:3*

<sup>19</sup> Yam, tipaesia varumim irau ndug tighaze ataghon katin Krisi saveen toni. Tauto agham ghou lolog poia kat. Ve naghaze ngar samia eta ineep toman gham malep. Ve ngar popoia, ghoroghilaala ve akisi. *Mt 10:16; Ro 1:8; 1Kor 14:20*

<sup>20</sup> Maaron toit, ye igham ghiit taneep poia toman lolood luuma. Mala maau pale iuul gham, leso atatan Sadan tapiri ve avazagi ila aghemim samba. *Mbnp 3:15; Syg 12:11*

Poia to Tiina toit Yesu Krisi ineep toman gham.

<sup>21</sup> Timoti, to yeru niluplup ghei pa uraat to Krisi ne, igham ndag poia payam. Ve tonvetaz tiou tol, Lusius, Yason, ve Sosipater, ndag poia todi ilat payam paam. *Mbanj 16:1+, 20:4*

---

\* **16:16:** Paulus imbood saveen tovene: 'Aghan avomim.' Nene ataam todi to tipatoot tighaze lolodi pa taudi. Ve iit tagham tovene maau. Tayanjin pa tamtoghon ve itinja tawakisin nimaad.



<sup>22</sup> Ve you Tertius paam naghām ndag poia tiou ilat payam ila Tiina toit iza. Paulus isavsaav, ve you nambodhood saveeṅ toni ila rau tonene.

<sup>23</sup> Gaius paam ighām ndag poia toni payam. Ye to ighām ghou naneep tomani ila ruum toni. Ye iṅgin poian ghou, toman tamtoghon tisob to Krisi to tiluplup di pa sunjuuṅ ila ruum toni. Ve Erastus to iṅgin yaam to ndug tonene, yesuru tonvetaz toit Kwartus tighām ndag poia todi ilat payam paam. *Mbanṅ 19:29; 1Kor 1:14*

<sup>24</sup> Poia to Tiina toit Yesu Krisi iza tiam. Onoon.

*Paulus ipait Maaron iza*

<sup>25</sup> Varu poia to Yesu Krisi to you navovotia, Maaron pale ipalot gham pani, lesō ayoon ariana. Onoon, muuṅ kat ve inim, varu poia tonene ivot ighazooṅ maau. *1Kor 2:7; Ep 3:9; Kol 1:26+; 2Tim 1:9+*

<sup>26</sup> Eemoghon yes propeta timbood saveeṅ. Ve aazne, Maaron mata yaryaara to ineep le alok, ye ivotia ighazooṅ wa. Ve ye avo iyaryaanṅ ighaze saveeṅ tonene ilaan irau ndug tisob. Lesō tighur ila to Krisi ve titaghon saveeṅ toni. *Ro 1:5; Tit 1:3*

<sup>27</sup> Maaron ite paam maau. Ye enṅeni. Ve ṅgar toni, nene tiina le tiina kat. Tovenen iit tapaiti pa tapiri ve poia toni ila Yesu Krisi iza. To aazne, ve itaghoni taghoni gha ila. Onoon.

**Maaron Saveen Toni Patabuan**  
**The New Testament and portions of the Old Testament**  
**in the Oov Dialect of the Saveeng language of Papua**  
**New Guinea. The Saveeng language is also called Mutu**  
**or Mutu-Tuam.**

**Sampela hap Buk Baibel long tokples Saveeng Oov**  
**long Niugini**

copyright © 2011 Wycliffe Bible Translators, Inc.

Language: Saveeng (Mutu)

Dialect: Oov

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-24

---

PDF generated using Haiola and XeLaTeX on 22 Feb 2024 from source files dated 31 Aug 2023

c7a45d99-91a2-564f-9c55-d2efc8be7fae